



Wantok

NUPELA YELO FIN TUNA

wantaim lomba na soya bin wel

Stap nau long stua klostu long yu

MOCEAN BLUE CHILLI TUNA

TRAIM WANPELA TUDE!

Namba wan kaikai bilong PNG ...

Namba 1875 Wan Wik Julai 22 - 28, 2010

Niuspepa Bilong Yumi Ol PNG Stret! K1 tasol

Sabina's Conner - P6 A crooked government by the crooks for the crooks

Oposisen: "I gat rot" NA: "Mipela gat 66"

Paul Zuvani i raitim

OPOSISEN i tok i gat rot yet long senisim gavman sapos Gavana Jeneral i singautim Palamen kibung long liklik taim bihain.

Na dispela inap kamap long narapela tupela wik taim.

Dispela i tok bilong Oposisen long taim ol i no amamas long Gavman i surukim taim bilong kibung i go long Tunde 16 Novemba bihain long dispela yia.

Se Puka Temu husat i deputi praim minista bipo na nau Oposisen i makim olsem kendidet bilong ol long kamap praim minista i tok ol bai lukluk long tupela rot long karimaut tingting bilong ol.

Dispela tupela tingting em:

" ASKIM narapela 15 memba husat pastaim i tok promis pinis long joinim ol tasol i stap yet wantaim gavman long joinim ol na kamapim namba long askim Gavana Jeneral long singautim Palamen hariap. Nau yet Oposisen i gat 45 memba na

" KOTIM spika long Nesenel Kot. Dispela em long wanem Spika Jeffery Nape i no bihainim Palamentari Stending Oda long harim askim bilong Oposisen. Dispela askim em long Oposisen i kamapim Vot i Nogat Bilip long gavman.

Mista Nape i tok nogat long mosen bilong ol bikos em i tok Oposisen i nogat namba. Tasol Oposisen i tok kain askim i bikpela na i strong moa long ol arapela askim na olsem Spika i mas harim.

Moa yet tupela taim Oposisen i

tok long divisen long ruling bilong Nape tasol em i no harim.

Kain samting i laikim Spika i mas larim vot i mas kamap tru na i no harim tasol singaut bilong ol Memba olsem em i mekim.

Long dispela Oposisen i tok long narapela tupela wik i kam em bai lukluk long dispela tupela rot long askim Gavana Jeneral long askim Palamen i kibung hariap.

Taim dispela i kamap Oposisen i tok em bai bringim gen toktok bilong em long Vot i Nogat Bilip long gavman.

Tasol pastaim long dispela ol samting i kamap long dispela de, Palamen i lukim kamap bilong nupela na namba 9 Gavana Jeneral bilong kantri.

Dispela em Se Paulias Matane husat i surukim narapela 5-pela yia bilong em bihain long win bilong em long ileksen long Palamen.

Bipo long Se Paulias i go insait long Samba bilong Palamen long tok promis long ai bilong Sif Jastis Se Salamo Injia Gavana bilong Milen Be, John Luke, i mekim poin ov oda long deputi spika Francis Marus olsem ileksen bilong Se Paulus long kamap Gavana Jeneral i no bihainim lo.

Long dispela as Palamen i no ken larim Se Paulus i mekim promis long kamap Gavana Jeneral.

Mista Marus i larim ol memba i vot long dispela mosen.

Dispela i lukim Gavman i win wantaim 59 vot na Oposisen i gat 42 na larim Se Paulias i go het long mekim tok promis bilong em.



ROT PAS: Spika Nape.



PAIT YET: Se Puka, kendidet bilong praim minista

Kisim Motorola WX181!



Baim Niupela Moto WX181. I kam wantaim FM redio na planti moa!

Olgeta fon igat fri kredit na frim sim kad stap insait pinis..

Digicel

Ekipela, Stropela moe Network bilong PNG.

Digicel Tems na Kondisen i stap.

OX & PALM
Since 1936

Em i liklik prais tu!!

I stap klostu long stua bilong yu...

Rait abus!



Palamen nius wantaim Paul Zuvani

Somare tok, "Bai mi kilim yu"

EM i sori tru long kantri i harim praim minista bilong wanpela kantri i tok long kilim narapela man.

Nogat hetman o praim minista bilong wanpela kantri i tok olsem inap long praim minista bilong Papua Niugini inap long tok olsem.

Dispela i soim olsem kantri i no stap gut na olsem sampela samting i mas kamap bilong lukim sekyuriti bilong ol manmeri mas stap gut, dispela i tok bilong Mema bilong Bulolo Sam Basil taim em i no amamas long tok Praim Minista Se Michael Somare i mekim long kilim em.

"Praim Minista i lusim sia bilong em, sia bilong spika na kam klostu long sia bilong mi, poinim pinga long mi na tok long kilim mi.



NO PRET: Basil, Mema bilong Bulolo.

"Mi no sori tru long harim olsem.

"Mi stap Mema bilong Bulolo na mi no pret.

"Nau laip bilong mi i stap ples klia na sapos mi dai famili bilong mi, ol pipel bilong mi long Wau Bulolo na ol sapota bilong mi long Papua Niug-

ini i ken save olsem praim minista i kilim mi," Mista Basil i tok.

Em i tok em i no mekim wanpela tok long Arthur tasol Se Michael i kros nating long difenim pikinini bilong em Arthur long go tokim em olsem.

Palamen Kibung suruk: Hauskuk Kabinet pret

OPOSISEN Lida Rait Honorabel Se Mekere Morauta i tok Spika bilong Nesenel Palamen na Lida bilong Gavman Bisnis i brukim gen Mama Lo.

Ol i no moa laik lukim Palamen i inapim namba bilong ol de bilong kibung bilong em olsem 63 long wanpela yia.

- Mi bai hariap long kisim tingting bilong lo long pait agensim dispela disisen long kot.
- Dispela mosen we lida bilong Gavman Bisnis Paul Tiensten i kamapim na Spika Jeffery Nape i tok orait long em i brukim Mama Lo.
- Em i go agens long olgeta tok bilong stap bilong demokrasik gavman.
- Disisen i kamap tude (Trinde 21 Julai) i bilong abrusim ol toktok bilong kamap bilong vot i Nogat Bilip long gavman.
- Em i soim kain gavman we i wari tru long holim opis yet bikos em i holim planti samting bilong em yet na i no laik long lusim.
- Disisen i no brukim Mama Lo tasol long wankain taim i brukim Palamentari Standing Oda.
- Spika i mekim disisen bihainim



PLANTIASUA: Philemon, Mema bilong Lae.

nek em i harim na i no mekim vot tru.

- Oposisen i askim long divisen na Spika i mas bihainim tasol em i no bihainim.
 - Kain pasin i soim olsem gavman em Nesenel Alains i go pas i bagarap pinis," Se Mekere i tok.
- Em i tok dispela gavman i laik lukim olsem fridom bilong ol manmeri long toktok, long mekim protes mas em gavman i pasim.
- Em i tok nau em i taim ol manmeri laikim lukim gavman bilong Somare i tokaut long ol asua em i mekim.
- Pastaim long dispela disisen i



PAIT NO PINIS: Namah, Mema bilong Vanimo Green.

kamap Oposisen i givim toksave i go long Spika bilong Palamen Jeffery Nape long kamapim vot i Nogat Bilip long gavman.

Dispela mosen em Deputi Oposisen Lida Bart Philemon i kamapim na Vanimo Green Mema na bipo Fores Minista na nau Oposisen Mema Belden Namah i sekendim.

Ol i mekim kamapim dispela mosen bai Spika i tok orait long stap 7-pela de pastaim olsem Palamentari Standing Oda i tok long em bipo long ol Mema i vot long em.

Tasol dispela i no kamap bikos Spika Nape i tok orait long tingting bilong surukim palamen kibung i go long Novemba.

Dispela disisen i no givim taim long Oposisen long karimaut tingting bilong ol.

Oposisen i tokaut long dispela ol as long kamapim vot i Nogat Bilip long gavman:

- PRAIM Minista (PM) yet i brukim ol lo. Difens Bod bilong Inkwairi i wanpela bilong em;
- PM i pasim wok bilong Ombudsmen Komisen bihainim long Komisen i askim em long em i mas givim ripot bilong mani em i yusim long wan wan ol yia;
- EM i no kamapim wok painim long hevi bilong mani i pas wantaim sampela ol opisa na Mema bilong Taiwan Gavman;
- I NO kamapim wok painim long hevi i pas long mani long wok bilong timba long Singapo;
- I NO bihainim ol askim bilong Pablik Akauns Komiti bihainim long ol wok painim bilong komiti;
- I NO mekim wok painim i go insait long ol akaun long Helt, Edukesen na Agrikalisa;
- I LARIM pasin bilong suviman long bihainim laik bilong narapela i kamap long taim Gavman I sainim Benefit Searing Agrimen (BSA) wantaim ol developa na papa-graun long wok bilong ges;
- I NO soim rispek bilong em long Palamen taim em i no save kamap long ol kibung;
- I GIAMAN long tok em i no save olsem em i gat ol sea holda long Pasifik Registri bilong ol Sip komiti na long ol wok bod i mekim na
- PM i nogat tingting long lukautim ol manmeri. Em i go pas long wanpela gavman i pulap long ol pasin nogut.

Abel laikim senis long OLIPPAC lo

John Samar (PM Dipatmen) i raitim

CHARLES Abel, Mema bilong Alotau long taim em i stap Minista bilong Kalsa na Turisim yet i askim ol lida bilong ol politikel pati long Papua Niugini long ol i mas painim

rot bilong strongim Oganik Lo long Integriti bilong Politikal Pati na Kendidet (OLIPPAC).

Long taim bilong welkamim 100 deliget bilong ol manmeri husat i kamap long namba tu kibung bilong OLIPPAC long Alotau, Milen Be Provins we i stat long 12 Julai na

pinis long 16 Julai Mista Abel i tok ol lidaman i mas glasim gut dispela lo bai i ken kamapim gutpela stap bilong kantri.

Em i tok gutpela kamap bilong dispela lo bai bringim stabiliti i kam insait long kantri na bilip long ol investa.

Moa yet dispela lo i mas sut i go long tingting bilong Visen 2050 tu.

Em i tok dispela lo em Suprim Kot i salensim we i gat asua na nau em i stap long han bilong ol lidaman long stretim dispela asua.

"OLIPPAC nau i senis na olsem umben i bruk na ol pis i swim nabaut, em wok bilong yupela long stretim dispela umben," Mista Abel i tok.

Em i salensim ol lidaman long ol i mas putim ol strongpela lo long pasim go kam bilong ol memba bilong ol.

Sinia politikel saintis long Nesenel Risets Institut (NRI) Dokta Ray Anere i tokim ol manmeri husat i stap long kibung olsem OLIPPAC i ken stap olsem bris bilong ol long bungim Visen 2050 aninit long Pila 2 bilong strongim demokrasi na gutpela gavanens bilong ileksen.

Em i tokim ol manmeri long tupela sevei em i mekim long tupela wod long Kanosia na Makerupu long Sentral Provins olsem ol manmeri husat i stap na bekim ol askim bilong em i

no memba bilong wanpela politikal pati.

Em i tok taim ol manmeri i vot ol i save vot long man ol i laikim long em na i no long pati kendidet i stap long em na polisi em i gat long em.

Na long laik bilong votim ol meri long Palamen ol manmeri i laik long votim ol man moa long ol i gat long votim ol meri.

Long dispela as em i tok bai gat hevi long lukim bikpela namba bilong ol meri long Palamen sapos ol i bihainim Jenerel lleksen na oslem i moa gutpela ol i mas redim sia bilong ol meri long Palamen.

Dispela em long lukim olsem Seksen 28 (b) bilong Mamba Lo i kamap tru. I olsem olgeta manmeri i gat wankain rait long kamapim na kisim amamas long developmen bilong kantri.

Long dispela taim tu memba bilong Trensinsinel Ovasait Bodi bilong Visen 2050 Alan Bird na Ekting Deputi Dairekta Jenerel bilong Rifoms wantaim PNG Visen 2050 long Developmen Senta bilong Dipatmen bilong Praim Minista na Nesenel Eksekyutiv Kaunsil Tony Keket i tok konferens long Alotau i gat bikpela tok.

Ol i tok dispela konferens i bilong lukim olsem olgeta polisi gavman i gat long em i mas sut go long tingting bilong Visen 2050.

OXFORD, TOK PISIN INGLIS DIKSENERI

Katim, na pulmapim oda fom daunbilo na salim i kam long Wantok Niuspepa sapos yu laik baem dispela Oxford Papua Niugini Dikseneri (Dictionary) we Wantok na Oxford wok bung wantaim long kamapim. Dispela buk i ken helpim yu tanim Tok Pisin i go long Inggris, o Inggris i go long Tok Pisin. Hariap na kisim wanpela bilong ol dispela gutpela buk we inap strongim Tok Pisin bilong yu.

ORDER FORM

ITEM	QTY	PRICE	TAX	SUBTOTAL
PNL Tok Pisin English Dictionary	1	97.00	1.20	103.20

Credit Card
 Cheque
 Cash

Name: _____
 Address: _____
 Phone: _____

FAX BACK TO: (675) 325 2579

Gavman amamasim ol koalisen pati wantaim ministri

Neville Choi i raitim

SAPOS oposisen i bin tingting planti long sans bilong ol long kamapim vot i nogat bilip agensim gavman, Praim Minista Gren Sif Se Michael Somare yet i no wari tumas long en taim em i tokaut long ol nupela minista long kabinet bilong em.

Etpela nupela minista i bin kamap long Gavman Haus long mekim tok promis bilong ol bihain long palamen i bruk i go inap Novemba.

Ol minista na sinia memba bilong gavman i bin amamas na tok stori namel long ol yet, pastaim long Gavana Jeneral Se Paulias Matane i kisim tok promis bilong:

Timothy Bonga (Nawae) husat bai bosim Forestri; Fidelis Semoso (Bogenvil Rijinel) husat bai bosim Bogenvil Afes; na Guma Wau (Kerowagi) husat bai lukautim Kalsa na Turisim.

Ol arapela nupela minista husat i no kisim ministri yet em:

Francis Potape (Komo Magarima); Benjamin Poponawa (Kerowagi); Lucas Dekena (Gumine); Moses Maladina (Esa'ala); na John Pundari (Kompiani-Ambum)

Se Michael i tok olsem ol nupela minista ol i makim em i givim gutpela luksave long

olgeta ol koalisen pati memba.

Nesanel Alaiens yet i kisim 4-pela ministri, Yunaitet Risos Pati i kisim tupela ministri, Pipols Pati i kisim wanpela na Rural Developmen Pati i kisim wanpela.

Narapela faivpela ministri we praim minista i no tokaut yet long en, em i tok bai Deputi Praim Minista Don Polye i tokaut long en dispela wik.

Se Michael i no toktok long ol minista memba bilong Angoram, Arthur Somare i lukautim, wanpela bikpela kros bilong ol memba bilong oposisen na bipo deputi praim minista, na NA memba Dokta Puka Temu.



NUPELA MINISTA: Guma Wau, Benjamin Poponawa, Lucas Dekena na Timothy Bonga.

Francis Potape, Fidelis Semoso, John Pundari, Moses Maladina.

Ol Poto: Nicky Bernard

Len rifom ken helpim PNG ikonomi long gro - NRI

James Kila i raitim

PAPUA Niugini inap kisim gutpela halivim long sait long ikonomi na gro sapos len rifom i kamap long kantri.

Wanpela stadi o wok risets pepa em Nesanel Risets Institiut (NRI) lonsim long aste (Trinde) long Mosbi tokaut long dispela.

Dairekta bilong NRI, Dokta Thomas Webster husat i lonsim dispela ripot i tokaut olsem dispela ripot i lukluk long sait long yusim ol stet graun we i stap nating na tu ol kastomari graun we ol papagraun i ken tok-orait long wok developmen i ken kamap long en.

Dokta Webster i tok olsem maski olsem maining risoses i helpim revenu o mani kantri i save kisim, len rifom i ken bringim moa mani long sait bilong ikonomi we i karamapim agrikalisa, hausing, turism, rurel developmen na tu long kamapim moa wok long ol manmeri insait long PNG.

Dispela ripot taitel bilong en "Land Reform in Papua New

Guinea: Quantifying the Economic Impacts" i soim olsem PNG i ken lukim planti ol gutpela wok i kamap sapos wok bilong len rifom stat long 2010 i kamap yusim wanem kain luksave em bilong PNG stret na dispela em i kamap long PNG yet.

Wok long kamapim dispela stadi em ol i yusim kompiuta long redim i soim olsem ikonomi bai gro, na gros domestic prodak (GDP) bai go antap olsem K12.3 bilion namel long 2010 na 2020. Dispela em sapos PNG i yusim wanem len developmen plen em i kamapim long PNG yet.

Ol lain husat i karimaut wok na raitim dispela risets ripot em Dokta Gae Kauzi, Dokta Charles Yala na Lindsay Fairhead. Ol dispela lain i yusim ol komyuta wok ol i kolim Komputabel Jeneral Ikwilibrum (CGE) mode bilong PNG ikonomi long glasim ikonomik developmen stat long 2010 igo inap 2020.

Foma minista bilong Lens, Dokta Puka Temu i bin kisim

askim long lonsim ripot ya, tasol bihain long senis i kamap long wok bilong em taim em i muv i go long oposisen, em i no bin stap long dispela seremoni.

Insait long dispela lonsing seremoni long NRI long Mosbi long aste tu i bin lukim planti ol gutpela toktok i kamap we sutim tok olsem i mas gat len (graun) edministresin sistem insait long PNG. Dispela sistem i mas wok

Dokta Webster i tokaut olsem dispela stadi em tripela saveman i mekim kamap i yusim samting olsem K75,000. Em i tok em i no bikpela mani olsem narapela ol stadi we i kos bikpela manitru. Dispela stadi bai helpim tru PNG long sait bilong len developmen.

Ripot ya i soim tu olsem hevi we nau planti ol wokman meri long taun na siti long kantri save painim we ol i nogat gutpela haus o ples bilong slip i soim olsem len rifom mas kamap.



HELPIM RED KROS: Ol 8-pela yangpela meri husat bai resis long kamap mis PNG long dispela yia. Poto: Nicky Bernard

8-Pela yangpela meri bai resis long kamap Miss PNG bilong 2010

Nicky Bernard i raitim

Dispela yia bai lukim 8-pela yangpela meri bai resis long kamap mis PNG, ol dispela meri husat krismas bilong 18 na go antap bai traime long mekim mani bilong Red Kros.

Insait long ol dispela meri 8-pela meri, 5-pela meri i gat spona na 3pela i nogat o wok yet long

pinim spona long helpim ol.

Long las wik Fonde ol lain i go pas long Mis PNG I bin losim o bin kolim nem bilong ol dispela yangpela meri husat bai resisi long dispela yia Mis PNG.

Ol dispela yangpela meri em, Mis BSP. Rachael James, Mis Digi-cel - Hariesa Tau, Mis South West Air Betty Levo, Mis Monier, Hebou

Construction, Airways na Lamana Sylvia Pascoe, Mis Manus Snex Vanessa Knight, Mis Gabriella Evara nogat spona, Mis Nicole Jeune nogat spona na Mis Michelle Mondia nogat spona.

Ol dispela yangpela meri i gat tripela wik tasol i stap bipo long ol makim husat bai kam nupela Mis PNG long August 7 2010.

Maggi

Hariap Long Kukim, Gutpela Long Kaikai

Ridres Asosiesen long US\$250 bilion kompensesen

Veronica Hatutasi i raitim

ASKIM i go long 6-pela kantri i bin stap insait long Wol Woa 2 pait long PNG bilong peim US\$250 bilion kompensesen long ol dai, bagarapim ol haus na gaden samting na humen rait bilong pipel.

Wanpela nupela asosiesen we ol i rejistaim long dispela yia tasol em ol i kolim long "PNG Re-Dress Association For World War 2 Victims Ltd" i wokim dispela singaut i go long ol gavman bilong ol Alaid o ol kombain pren soldia bilong Amerika (United States of America), Australia, Nu Silan (New Zealand), Gret Briten (Great Britain) wantaim tupela birua kantri em long Japan na Korea.

Longpela taim Palamen memba bilong Is Sepik em Se Pita Lus i petron na tresera taim Kinock Kilik em i nesanel siaman ba dairekta bilong dispela nupela ogenaisesen i makim maus bilong planti pipel i bin dai, kisim bagarap na bungim hevi long 11-pela provins long PNG na ol i mekim dispela singaut. Dispela 11-pela provins em pait i bin kisim ol nogut long Wol



SINGAUT LONG US\$250 BILION KOMPENSESEN: Se Pita (namba tu long rait) Mista Kilik (namba tu long rait) na ol narapela memba bilong nupela PNG Ri-Dres Association For World War 2 Victims Ltd. Poto: Veronica Hatutasi

Woa 2 em long Oro, Milen Be, Morobe, Madang, Is na Wes Sepik, Is na Wes Nu Briten, Nu Ailan, Manus na Bogenvil.

Mista Kilik i tok olgeta pepa bilong ol wantaim ol ripot long ol nem, hamas lain i kisim ol wanem kain bagarap, hamas manmeri i dai na husat i kamapim ol bagarap na dai i redi i stap. Ol i gat ol woklain i stap pinis, tasol nau ol i wok long painim opis bilong sindaun gut

na karimaut gut wok long en. Nau yet, komiti na ol woklain i save bung long haus bilong Se Pita na toktok na mekim ol wok.

Long mekim klia, wanpela asosiesen wantaim wankain nem i bin wok long planti yia, tasol ol ripot i tok pasin bilong paulim bikpela manimak bilong pipel em samting olsem K11 milion i mekim na ol lida i hait i stap.

Long wanpela bung wantaim Wantok Nius, Se Pita na Mista

Kilik i tok ol i makim olgeta hap bilong PNG. Nau yet asosiesen i karimaut ol wok awenes i stap, tasol ol i salim pinis ol pas i go long ol embasi na ol gavman i papa long ol soldia i bin kamapim ol dai, bagarap na hevi long ol pipel bilong PNG.

"Mipela i askim dispela ol 6-pela kantrilong peim US\$250 bilion kompensesen mani bikos taim pait i pinis na i kam inap nau, nogat wanpela long ol kantri i kam na tok sori long gavman na pipel bilong PNG long ol bagarap na dai pait bilong ol i bin kamapim. Mipela i no inap lusim tingting na larim ol lain i dai i go nating.

"Dispela pait i no bilong yumi. Tasol yumi sindaun gut na i no wokim wanpela samting i stap na Amerika, Australia, Nu Silan, Gret Briten wantaim Japan na Korea i bin kisim pait i kam moa long 60 yia i go pinis na yumi kisim bikpela bagarap na planti lain bilong yumi tu i dai. Tasol nogat wanpela gutpela samting long helpim stretim ol ples, ol rot na tu, nogat wanpela long ol 6-pela kantri i autim tok sori bilong em.

"Ol bagarap i karamapim ol humen rait birua, sampela ol meri ol i yusim ol olsem ol pamuk, bagarapim ol haus na gaden kaikai, kilim dai ol man wantaim bainat na kilim na kaikaim man na ol lain i bin karim ol kago bilong ol Alaid na Japan soldia. Pipel bilong yumi i bin kisim longpela taim long kamap orait long ol hevi na bagarap woa i bi kamapim. Mipela i gat ol evidens o tok tru long ol bagarap na dai long Wol Woa 2 ol pipel long dispela kantri i bin bungim," Se Pita na Mista Kilik i tok.

Tupela i tok ol i no laik harim olsem ol dispela kantri nau i wok long givim helpim (AID) bikos dispela i bilong ol wantaim nesanel gavman.

"Samting mipela i laik stretim em kompensesen long ol bagarap long

Wol Woa 2 pait. Rot we mipela i kamap wantaim dispela US\$250 bilion em i go olsem. Peim K1 milion i go long ol hauslain bilong wan man ol Japan na ol Alaid soldia i bin kilim na kaikaim, kilim ol dai taim ol i wokim pasin nogut long ol i kilim ol wantaim bainat. Peim ol famili na hauslain K50,000 long ol wan man na meri ol i bin yusim ol olsem ol seks sleiv, peom K100,000 long ol lain ol i bin yusim ol olsem ol polis na soldia, peim K35,000 long ol jenerel keria, ol kuk, ol lain i bin save painim na redim kaikai, ol skaut na ol dokta. Na K25,000 long ol wan man meri i bin ronawe na dai long bus," Se Pita na Mista Kilik i tok.

Ol i tok wan wan long ol 5-pela kantri bai peim K40 bilion na namba 6 em Japan bai peim K50 milion.

Mista Kilik i tok long ol wok painimaut, asosiesen i bin painim olsem ol birua we Japan i bin mekim i go agensim stret humen rait, kilim nogut pipel na nogut tru em ol i bin katim ol tambu bilong pipel, katim susu bilong ol meri. Kain samting olsem em ol i no mekim long ol narapela hap bilong wol.

"Ol yangpela meri i bin lusim ol rait na luksave bilong ol bikos long ol samting we ol soldia bilong Japan i mekim long ol. Tu, asosiesen i gat rekot i soim olsem Australia na ol Alaid soldia i bin rikrutim o kisim long mekim wok olsem ol keria 55,000 pipel bilong PNG long taim bilong pait, 8,000 olsem ol soldia na polisman. 22 Orokaiva man ol soldia bilong Japan i bin kisim ol long pait egensim ol Alaid soldia. Wanpela ami komanda bilong Australia i bin hangamapim ol dispela 22 Orokaiva man na olsem, Australia i mas peim kompensesen long ol lain bilong ol i bin kilim dai ol long rabis rot tru," Mista Kilik i tok.

Niugini prut kampani kamapim nupela wain

Paulus Tali i raitim

NIUGINI Prut kampani (NGFC) long Goroka em bisnis bilong ol asples pipel i wok long kamapim ol nupela senis we i lukim nupela prut wain i kamap long dispela taim.

Nesanel Seils na Maketing Menesa Michael Lapuve i tok NGFC i kamapim nupela prut wain i redi nau long kamapni i salim long maket long PNG.

Ol i kolim dispela nupela prodak long "Mutasi Prut wain" na Mista lapave wantaim tu bikpela bosman bilong kampani em James Watson i tok ol Hailans manmeri na ol Saina man i laikim dispela nupela prodak.

Tupela i tok long kamapim dispela wain em ol i mekim long Hailans em ol i yusim ol narapela prut olsem jam na prut dring.

Kampani i stap 6 Mail ausait tasol long Goroka taun na moa long 200

pipel i wok long en. Planti bilong ol em ol lain i no kisim sans long skruim skul bilong ol na pinis, ol yut long ples bikos kampani i laik helpim ol ples lain.

Em i 15-pela krismas nau taim Niugini Prut kampani i kirapim wok na em i lukluk moa long givim sevis i go long ol komyuniti na pipel bilong Isten Hailans, aninit long kaikai projek.

Olsem hap bilong sapatim komyuniti, kampanilong las mun i bin helpim Notofona Praimeri skul wantaim K66,000 long sanapim dabel klasrum bilong em.

Edukesen Minista James Marape i bin tok amamas long kampani i sapatim edukesen program na soim gutpela piksa.

Bosman Mista Watson i gat bilip olsem kampani bai helpim long kisim rurel ilektrifikesen o pawa long ples Notofona.

SAFETY	LIFTING	ENGINEERING TOOLS	PUMPS



BISHOP BROTHERS

everything for industry...

EMAIL: sales@bishopbros.com.pg

WEBSITE: www.bishopbros.com.pg

Stil gavman ol stilman bosim bilong ol stilman

LAS WIK mipela i askim: "I tru olsem politiks na pasin pamuk em tupela namba wan wok long wol?"

Wanpela rida bilong mipel ai bekim na tok: 'Tupela? I gat wanpela namba wan wok long wol, na dispela em wanpela singaut bilong 'sevim' pipel. Long bihainim pasin tru, mipela i kolim ol dispela lain husat i save mekim pasin pamuk, olsem ol 'politisen'.

Tenkyu tru long koreksen bilong yu. Plis, noken mekim moa toktok! I gat wanpela arapela toktok we olgeta bikpela ami i save bihainim. Dispela i kam long wanpela hap tingting wanpela man Saina, Sun-Tzu i raitim na kolim The Art of War. Wanpela sapta bilong dispela buk i tok olsem:

*'Now the general is the bulwark of the State:
If the bulwark is complete at all points, the State will be strong; if the bulwark is defective, The State will be weak.
There are three ways in which a ruler can bring misfortune upon his army:-*

- (1) *By commanding the army to advance or to retreat, being ignorant of the fact that it cannot obey. This is called hobbling the army.*
- (2) *By attempting to govern an army in the same way as he administers a kingdom, being ignorant of the conditions which obtains in an army.*
- (3) *By employing the officers of his army without discrimination, through ignorance of the military principles of adaptation to circumstances. This shakes the confidence of the soldiers."*

Dispela em i wanpela gutpela toktok Se Michael Somare i mas tingim sapos em i abrusim bunara bilong vot i nogat bilip.

Long tok klia long ol rida bilong



mipela, dispela hap tok antap, 'bulwark' em i min wanpela samting bilong banisim skin. Olsem na dispela hap tok i min olsem jeneral em i banis bilong kantri bilong em. Sapos jeneral i strong long olgeta kona, kantri bai strong. Tasol sapos jeneral i asua, kantri tu bai asua.

I tru olsem nau kantri i nogat gutpela stia i kam long ol politikal lida yumi gat nau, em praim minista na ol lain mangi bilong em.

Yupela ken tingim Saddam Hussein na ol raskol bilong em, husat i bin ronawe nabaut taim Amerika i go insait long kantri. Na sapos yumi lukluk gut long Se Michael na ol bois bilong em; ol tu bai ron sapos bikpela birua i bungim kantri. Sindaun nau na belpen bilong ol manmeri i wok long lukim dispela kain hevi bai kamap klostu. Polis i nogat inap strong long pasim wanpela kain hevi olsem. Na difens fos bilong yumi i nogat disiplin moa na ol hetman bilong ol i no save long pes o nem bilong ol soldia long graun.

Tru tumas, Se Michael i no olsem Saddam husat i kilim ol lain i autim tingting agensim em, tasol sapos yumi kisim bek Se Michael na ol bois bilong em bihain long 2012, bai yumi bagarap.

Yu ken lukim nau olsem Se Michael i no moa luksave long mama lo bilong yumi. Em i rausim pinis bikpela hap bilong Lidasip Koud na Environmen Ekt 2000 taim em i:

(a) rausim ol pawa bilong Ombudsman Komisen long givim

oda long gavman;

(b) mekim wok bilong ol hetman bilong dipatmen long yusim pablik mani long laik bilong ol bihain long gavman i skelim insait long nesenel baset;

(c) makim wanpela palamentari komiti long Ombudsman Komisen aninit long lidasip bilong Maladina na givim ol pawa bilong supavisen long komisen;

(d) senisim Environment Act 2000 na givim olgeta pawa long Dairekta long givim laisens long wanem ol projek opereta olsem maining, logging, na petroleum kampani long mekim long laik bilong ol taim ol i holim tok orait bilong Dairekta;

(e) rausim ol rait bilong ol pagraun na ol arapela manmeri long kotim ol developa sapos busgraun na wara i bagarap;

(f) rausim pawa bilong ol kot na pipel long glasim rait bilong gavman long tok orait long ol developa kampani; na

(g) givim husat i holim tok orait long bagarapim busgraun na bai nogat lukautim bilong gavman.

Olgeta dispela samting i soim klia olsem Se Michael na lain bilong em long gavman i no inap lukautim pipel na sindaun bilong ol, o graun, wara, bus na solwara bilong ol. Nau yet, ol i wok long bungim pawa bilong ol i stap long kisim mani bilong ol yet. Olsem mipela i tok las wik, politiks long dispela kantri em i samting bilong kisim pawa na mani bilong politisen na ol lain bilong em.

Nau sampela hap bilong Ogenik Lo long politikal pati i go aut, Oposisen i gat sans long senisim gavman, tasol mipela i ting dispela bai nonap kamap. Sapos Oposisen i win long kisim mosen i go long floa bilong palamen, gavman bai daunim ol yet na win. Tasol dispela bai lukim olgeta mani long nesenel tresari bai pinis na olgeta ol palamen memba bilong yumi, long gavman na oposisen wantaim, bai tromoi

mani long laik.

Gavman bai baim olgeta memba bilong holim strong sapot bilong em. Nau LNG ges projek i laik kirap, bikpela mani i wok raun insait long kantri. Na ol dispela politisen i stap long gavman nau bai no inap long go aut isi isi. I gat planti mani tumas i stap.

Oposisen i mas bungim gut politikel bes bilong em na stat plenim atek bilong ol long kamapim gavman long 2012. Ol pipel husat i wari long ol Ogenik Lo long politikal pati olsem i nogat moa gutpela sindaun bilong gavman i stap, long ol dispela lain, mipela i laik askim yupela wanpela kwesten: Politikal stabiliti bilong mekim wanem tru? Na dispela politikal stabiliti insait long las tripela yia long 2007 i kam i helpim PNG olsem wanem tru?

Taim yu stat long skelim astingting tru bilong politikal stability, bai yu luksave olsem Se Michael na ol raskol bilong em i wok yusim politikal stabiliti olsem pletform bilong bagarapim konstitusen, makim ol lain bilong ol yet i go long holim bikpela opis na oraitim ol lo ol yet i laikim. Em nau, yumi laikim dispela ol samting aninit long het tok Politikal Stabiliti?

Watpo na yumi wari tumas long politikal stabiliti o instabiliti?

Yumi mas lukluk tu long senisim dispela politiks sistem bilong yumi. Nau, taim yumi votim ol memba, ol i go long palamen, na bihain, politikal pati sistem i save daunim ol.

Taim ol i tok ol i stap wantaim dispela politikal pati, ol i no moa sevim yumi pipel. Nogat. Nau ol i sevim pati, na mas bihainim laik bilong ol pati lida bilong ol, husat bai yusim ol bilong bungim namba bilong kamapim gavman.

Bihain, ol pati lida bai makim husat ol memba ol yet i laikim, long kamap Minista na bikpela hap namba bilong ol pati memba bai mas sindaun long ol bek bens olsem ol 'politikal dropout'.

Em nau, bai wan wan memba husat i kamap minista bai kisim olgeta gutpela na ol arapela memba bai raun olsem ol hangre dok painim ol hap bun long palamen. Long dispela tasol, na i gat belhevi we i kamapim politikal instabiliti.

Ol bikpela namba politisen long arere i les pinis long lukim ol wan wan memba insait i wok long pati long kaikai, olsem na ol i laik bruk i go insait long namel tu long kisim hap kaikai.

Dispela pasin i save mekim memba i kamap turangu man bilong ol pati lida bilong em. Ol vota bilong em nau i nogat maus long toktok long palamen sapos memba bilong ol i no kamap minista.

Dispela memba husat i no kisim wanpela ministri em i olsem wanpela soldia husat i pait long woa, na i gat planti katres, tasol em i nogat gan bilong yusim ol katres.

Wankain olsem Dokta Allan Marat i painimaut, em i no inap long singaut na kros sapos ol lida bilong em i rausim gan bilong em long pait.

Yumi mas lukluk long dispela sistem we i save givim pawa long han bilong sampela tasol taim ol i kamap minista. Ol arapela nau bai sanap lukluk tasol, na politikal pati i gat namba bai yusim ol bilong mekim namba tasol bilong oraitim ol lo olsem senis long Lidasip Koud na Environmen Ekt.

Na sapos yumi pretim ol foren invesmen i go aut bikos i nogat politikal stabiliti long kantri, em i orait.

40 yia nau bihain long indipendens, na mipela i kisim bikpela hap foren invesmen long kantri, tasol ol pipel bilong yumi i stap wankain yet.

Politikal instability long dispela kantri em i samting i kamap klostu klostu nau. Olsem na politiks i wok long kamap bihainim laik bilong ol lain i holim pawa long gavman, bilong kisim kaikai bilong ol yet. Sapos yumi no senisim dispela pasin, bai yumi stap olsem tasol.



**Putim was long
40 Yias Anivesari
bilong Wantok Niuspepa!
Spesol Saplimen
i kam klostu long dispela pepa
bilong yumi ol PNG stret!**



A crooked government by the crooks for the crooks

In the commencing paragraph of this column last week, we posed the question:

"Any truth in the suggestion that politics and prostitution are both the oldest professions in the world?"

On of our readers wrote in, thus: *"Two professions? You're joking! There is only one oldest profession in the world. And it is a calling 'to serve' people. Out of politeness, we call those engaged in the trade, 'politicians', rather than the vulgar term, 'prostitutes'. Thank you for your correction. Please, no further comments!"*

Apart from the oldest profession above, we are also told that the oldest military treatise in the world, *The Art of War*, was written by a Chinaman, Sun-Tzu, some 2,500 years ago. In one chapter under the heading, "Attack Under Strategem", the author says:-

"Now the general is the bulwark of the State:

If the bulwark is complete at all points, the

State will be strong; if the bulwark is defective,

The State will be weak.

There are three ways in which a ruler can bring misfortune upon his army:-

(1) *By commanding the army to advance or to retreat, being ignorant of the fact that it cannot obey. This is called hobbling the army.*

(2) *By attempting to govern an army in the same way as he administers a kingdom, being ignorant of the conditions which obtain in an army.*

(3) *By employing the officers of his army without discrimination, through ignorance of the military principles of adaptation to circumstances. This shakes the confidence of the soldiers."*

The above is a timely reminder to Sir Michael Somare that whether he survives the coming onslaught by the looming Motion of No Confidence and how he does that would have already been determined by his past conduct in both the manner in which he had governed the country in general and in particular the manner in which he had been mistreating the many politicians supporting him in parliament as back benchers.

For our general readers, the dictionary definition of 'bulwark' is 'anything used for protection or defence'. Thus, the first quote above would mean that the general is the protector or the defence for his country so that if the general is strong in all points, the country will be strong, but if the general is defective, the country will be defective.

Seen in the context of the above, it is true that the way this country is performing now is a tru reflection or



the lack of it on the part of our present political leaders in general and in particular the very poor leadership quality of the prime minister and his batch of ministers of state.

Just remember what happened to Saddam Hussein and his gangsters before they started fleeing for their lives on the eve of an American invasion. And you watch Sir Michael and his mob; they will be fleeing with their tails between their legs the moment any civil unrest starts in this country and you do not need to wait too long for that now. The conditions are now ripening for exactly that. The police force does not have the capacity to handle any kind of civil unrest or uprising. The military has no discipline and those in command have lost touch with the common soldier on the ground.

True, unlike Saddam Hussein, Sir Michael and his mob has not done any random killing of dissidents and citizens alike, but don't you fool yourself. If we maintain Sir Michael and his boys beyond the year 2012, we shall be doomed forever. We are heading that way right now. You can see the trend that Sir Michael is now setting. He does not respect the constitution. He has just done away with the major part of the Leadership Code and the Environment Act 2000 respectively by:

(a) getting rid of the powers of the Ombudsman Commission to give directions to the government;

(b) making it the constitutional duty of departmental heads to spend public money so long as the government has allowed it by making the allocation in the national budget;

(c) appointing a parliamentary committee on the Ombudsman Commission under the leadership of Maladina and giving the powers of supervision of the commission;

(d) amending the Environment Act 2000 and concentrating all powers on the Director to issue licences to any project operators like mining, logging, and petroleum companies to do as they please provided that they have that approval from the Director;

(e) taking away the rights of landowners and other concerned people to take the developers to court if the environment is being polluted;

(f) taking away the powers of the courts and the people from

questioning the rights of the government to grant such approval to these developer companies; and

(g) giving the holder of the approval unlimited power to destroy the environment without any control or supervision by the government.

These are signs that Sir Michael and his mob in government cannot be trusted to look after the people and their interests including their lands, rivers, lakes, the seas and the whole environment. Right now, what they are doing is consolidating their political power and using that power base to enrich themselves. Like we said in the last column, politics in this country is all about power and money for the politician and his crony.

With the Organic Law on political parties gone, the Opposition has a chance to overthrow this government, but our hunch is that this government will not allow that to happen. If the Opposition does succeed in getting the motion as far as on to the floor of parliament, then the government will still defeat the motion and come out the winner. But the cost of introducing that motion will be that the national treasury will be emptied of all its funds and all our parliamentarians, both opposition and government alike, will be loaded with cash payouts by the government as bribes to maintain their political power.

The government will simply pay everyone off and that way maintain its position in government. With the LNG gas project underway and all that money floating around the country, the present batch of politicians in power will not allow anybody to get them off the scene that easily. There is just too much money at stake. And you can bet your last kina that the major players supposedly representing the state's interest in the LNG Project all have personal slices of the cake slotted in somewhere in the project agreements or associated agreements.

What the Opposition ought to do is to consolidate their political base and then start to plan their line of attack to gain the numbers to form a government in 2012. People lament that the Organic Law on political parties that maintained a stable government has been thrown out the window. For those people, let us ask them one simple question: Political stability for what purpose? And how has that political stability in the last three year since 2007 helped PNG?

When you start to question the rationale for political stability, you come to realize that Sir Michael and his gangsters had used political stability as a platform to violate the constitution, appoint their own people into positions of power and

influence and pass any laws at will using that political stability. Is this what we want to gain from political stability?

Yes, we have problems copying the Westminster system of government and we have multitude of other problems both social and economic, but these are simple signs that there is something wrong with both the people in government and the citizens themselves. When you look at these problems, they are signs that we are not doing our job well or there are areas in the lives of our people that we are not attending to. Thus, when you experience political instability then the onus is on the politician to take a closer look at his own backyard to determine why the problem, where it is coming from and then attend to that problem. And why are we so paranoid about political stability or instability?

The entire Westminster system of government needs to undergo a major overhaul. Presently, we elect our members, send them to the parliament and from there, they are swallowed up by the political party system.

The moment they identify themselves with a political party, they switch their allegiance from their constituents to the party and thus become subservient to the political whim of their party leaders who then use them for their numbers to form a government. The party leaders then select their preferred members to become Ministers of State whereas the bulk of the party members have to join the backbench as "political dropouts".

Meanwhile, those few members who become Ministers of State become the biggest beneficiaries of the Westminster system of government with their prime minister presiding. The prime minister who heads this horde of baboons feeds on or lives off the national treasury whilst the rest of the members of parliament roam the corridors of power like hyenas scavenging for any leftovers. This case scenario is the underlying cause for the political instability. That majority of politicians on the outside get tired of watching those inside feasting to no end, hence this eagerness to break into the inner circle to partake in the feasting.

Thus, the moment the elected member reaches parliament, he becomes a slave to the political wishes of his party leaders. His voters on the other hand are left without a voice both in the parliament and within the machinery of government especially if he did not make it as a minister. The ball game is then elevated to be played within a rather superficial field or level of policies, technocratic influence and self serving interests of

the party bosses which further isolates the political dropouts and thus renders them redundant in their status (as people's representatives) and any good intentions they may have had become obsolete or meaningless. The unfortunate parliamentarian who did not secure a ministry is like a soldier on the battlefield with plenty of bullets, but no rifle. He has been stripped of his rifle by his political party bosses. And as Dr Allan Marat found out, he cannot scream and yell if he has lost his rifle to his political bosses.

What we ought to do is to have a second look at this system of concentration of power in the hands of a few fortunate members who are appointed ministers. The rest become spectators and are used by the governing political party to constitute a quorum during parliamentary sessions to enable the crooked government to pass laws like the amendment to the Leadership Code and the amendment to the Environment Act.

We ought to bring in reforms to ensure that parliament maintains its supremacy and not to be used by the governing political party as its dishwasher. This is total abuse of the view that the national parliament is the supreme law making body in this country. Looking at it now you would think that the National Alliance and its leaders are the supreme lawmakers and breakers in this country.

And even if we chase foreign investment out because of our political instability in the country, so be it? So far 40 years after independence and given all that foreign investment in the country, how better off are our people now? They are even poorer than they were in those past years. And look at our politicians like the Sir Michael Somare, Sir Julius and Sir Mekere. Are these gentlemen poor because they had spent most of their lives in the service of the people with no time to do private business?

Political instability in this country is a sign of the times. Given time and given the right exposure, our people will reach a point in their lives when political, economic and social theories will be shaped by realities to become norms and that way readily acceptable to the people at large.

At this stage, politics like anything else in PNG, is fluid, hence the shifting political tides in large part being dictated by the manner in which the political powers in government use and abuse their public offices. We have yet to build up a tradition of fair play by observance of established practices and procedures.

Ol sumatin i sindaun long Riprodaktiv Helt trening woksop

HIV/AIDS na Riprodaktiv Helt em tupela bikpela wari eria long kantri na moa yet long planti ol yangpela pipel.

Olsem na long wanpela wik bilong Tem Tu skul malolo long dispela mun i bin lukim 26 sumatin bilong ol sekonderi skul long Nesenel Kapitel Distrik i sindaun long "Peer Edukosen Trening" wantaim fanding o mani long ranim dispela woksop i kam long PNG Populesen Fan. Yang Wimens Kristen Asosiesen (YWCA)I bin ranim dispela woksop aninit long Adolosen Riprodaktiv Helt Projek bilong em.

Riprodaktiv helt em ol hap long bodi we i save wokim pikinini long em.

Kodineta bilong Adolosen Riprodaktiv Helt Projek em Lorraine Siraba taim em i amamas long dispela trening kos i kamap i bin tok Riprodaktiv Helt mak long dispela kantri glasim wantaim ol narapela kantri long Pasifik rijen na wol i no gutpela. Na ol yangpela we klostu i haf long PNG popule-



LAINIM LONG HELPIM OL PORO: Dispela em ol sumatin i bin sindaun long wanpela wik kos. Poto: YWCA Midia

sen em ol grup we ol hevi long AIDS na Riprodaktiv Helt eira i ken kamapim wari na hevi.

"Em bai nogut tru long kantri sapos ol yangpela long kantri i nogat save long ol samting i ken bagarapim ol, Tasol Yut na Adolosen Helt (YA) klab em i gutpela rot we ol yangpela pipel i kisim infomesen na kamapim awenes long senis i kamap long PNG tude", Misis Siraba i tok.

Ol sekonderi skul sumatin insait long Nesenel Kapitel Distrik olsem Gordons, Badihagwa na Jubili Sekonderi skul i bin stap long dispela tupela wik woksop.

YAH em i wanpela grup we Josiah Sauna bilong Jubili Sekonderi i statim wantaim tingting long painim ol ansa na plen long etresim ol wari na hevi we ol yangpela pipel i save bungim long em. Ol i kamapim dispela ogenesesen nupela tasol em i polim pinis ol 80 ol yangpela memba i kam long ol narapela skul na sios yut grup.

BSP helpim pait agensim sik AIDS wantaim K50,000 donesen

...Opisa bai skruim ol BAHA wokples awenes na trening

BENG bilong Saut Pasifik i skruim wok we ol bikpela kampani mekim long pait agensim sik AIDS wantaim K50,000 donesen i go long PNG Bisnis Koalisen Agensim HIV/AIDS (BAHA).

BSP em i wanpela bikpela sponza bilong BAHA na dispel bikpela manimak em i givim long BAHA las wik i hap long komitmen long sapotim wok bilong BAHA we praivet na bisnis sekta i givim mani helpim long pait agensim sik AIDS long PNG.

BSP i gat HIV wokples polisi o lo wantaim BAHA na aninit long polisi bilong lukautim ol

wok lain bilong em, em i save karimaut ol wok awenes na trening long wokples. Long wankain taim tu, BAHA i save lukim olsem wanpela o tupela beng memba long ol brens bilong em long kantri i sindaun long ol trening bilong em taim ol BAHA trening tim i raun i go long ol provins long karimaut ol HIV wokples trening bilong em.

Taim BAHA i tok tenkyu long donesen bilong BSP beng, em i singaut long ol narapela kampani i wok long PNG long lukim ol BAHA lain bilong helpim ol i developim ol HIV/AIDS wokples polisi bilong ol we bai helpim ol long etresim HIV na helpim ol

woklain na ol famili bilong ol.

Long wankain taim, Lending o Dinau seksen opisa bilong BSP, Richard Kama, i bin kisim ol samting long BAHA bilong helpim em i karimaut ol trening wok na program long olgeta BSP brens long kantri.

Mista Kama i bin sindaun long wanpela kos bilong BAHA na long pinis bilong kos, em i kisim setifiket na beg i gat ol tul o samting long helpim em i karimaut ol wok awenes na trening na go hetim BAHA wokples polisi long beng.

Ol samting bilong helpim em i karimaut wok long pait agensim AIDS long wokples em long

buklet i gat ol awenes long ol woklain na ol famili bilong ol, moa infomesen i sut long HIV/AIDS na ol sevis olsem Volunteri kaunseling na Testing, ol STI klinik, stretpela rot long yusim ol samting bilong banisim sik AIDS, ol program bilong senisim pasin, jenda(man na meri) na helti laipstail.

Mista Kama i bin promis long karimaut gut wok long kisim program i go aut na ol woklain bilong BSP i ken banisim ol yet long sik AIDS na stap gut, helti na strong long mekim wok bilong ol.

Balimo haus sik kisim K40 milion helpim long Ok Tedi maining

MOA long 50,000 pipel long Midel Flai distrik long Westen provins bai kisim gutpela helt sevis bihain long bikpela wok long kamapim gut na mekim bikpela moa Balimo Distrik haus sik.

Ok Tedi maining kampani aninit long Takis Kredit skim program bilong em i givim K40 milion i go long Evanjelikel Sios bilong PNG (ECPNG) i papa long dispel haus sik bilong kariamut ol wok long haus sik ya.

Balimo Distrik haus sik i wok moa long 50 yia pinis long sevim ol pipel bilong Midel Flai eria na ol siklain we narapela 17-pela rurel helt senta insait long distrik i save salim ol i go bikos long ol bikpela sik we ol i no inap long givim helpim long ol.

Aninit long projek, ol i rausim olupela bild-

ing na bai sanapim nupela bildim we bai i gat ol nupela samting long ol siklain i yusim na ol nupela masin bilong ol dokta i yusim long wok bilong ol long helpim ol siklain.

Dairekta bilong ECPNG helt sevis long Midel Flai, em Suli Gayani i tok stat yet long haus sik i kirapim wok moa long 50 yia i go pinis, ol i no mekim wanpela bikpela wok long stretim haus sik. Tasol haus sik i go het yet long givim sevis long ol siklain long ol komyuniti long taun na ol ples. Tasol em i autim tok amamas i go long Ok Tedi maining long bikpela sapot ol i givim na tok dispela em i bikpela blesing we bai helpim ol i givim gutpela sevis moa i go long ol pipel.

Projek bai pinis long neks yia Ogas.

I Gat Hop i maus bilong pipel wantaim AIDS

ASKIM i go aut long ol narapela ogenesesen long sapotim I Gat Hop bilong karimaut ol wok olsem maus bilong ol pipel i stap wantaim binatang bilong AIDS.

Siaman bilong Nesenel AIDS Kaunsel (NAC), Se Peter Barter i tok olsem taim em i autim tok amamas bilong em i go long I Gat Hop Inkoporetet long kamap olsem nesenel am-

brela bilong ol Pipel i Stap wantaim AIDS binatang (PLWHA).

"Mi amamas long lukim olsem I Gat Hop i bin kirapim olsem wanpela liklik ogenesesen long 2003 tasol em i gro na kamap strongepla inap tude long makim ol PLWHA na ol netwok bilong ol long PNG," Se Peter i tok.

Se Peter i tok NAC i sapotim disisen bilong I Gat

Hop long nupela gavaning bodi bai gat wanpela man i makim PLWHA long wan wan provins long kantri na 9-pela nesenel memba bot i lukautim.

Em i tok aninit long dispela plen, ol bai harim maus na wari bilong ol PLWHA long olgeta provins na wanem ol samting ol i laikim em ol bai glasim na lukluk long ol.



Gutnius long ol Mama

TOKSAVE i go long ol meri tude! Planti taim ol i harim mi tok olsem, "Ol meri i gat bel i mas go hariap na sekim blut bilong ol. Nogut yu gat HIV vairs o binatang na yu no save."

Mi save tok strong olsem bikos nau yumi stap long taim nogut. Dispela vairs, HIV, i go kamap bikpela insait long komyuniti na yumi no save husat i HIV pinis o nogat. Nogut yu kisim HIV long man bilong yu o yu kisim long wanpela boifren bilong bifo na yu no save.

Olsem wanem bai yu sekim blut? Yu sekim bikos yu wari long yu yet na long bebi i stap long bel wantaim. Tasol mi tokim yupela meri nau - tingim bebi! Sekim blut bikos yu laik bai bebi bilong yu i gutpela tru na helti.

Yu sekim blut, na nau bai yu mekim wanem? Sapos blut bilong yu i gutpela na nogat HIV, em i gutpela. Yu ken bel isi nau. Sapos yu gat HIV, i gat gutpela marasin bilong lukautim yu yet na bebi wantaim. Wanpela nupela tok em dispela. Sapos yu HIV pinis (na yu yet save yu HIV pinis) na yu laik karim pikinini, mobeta yu dring ART ("antiretroviral") marasin foa wanpela ful yia bipo yu kisim bel. Na sapos yu painimaut yu HIV taim yu bel pinis, yu mas go hariap na stat long dring ol ART drag; bai marasin i was long yu na long bebi i stap long bel tu wantaim. Bebi i ken kisim HIV long mama taim em i stap long bel, long taim bilong karim pikinini, na long taim bilong dring susu. Tasol ART marasin i save was gut tru long ol bebi long dispela tripela taim.

Orait! Wanpela stadi-riplot i kam long Amerika. Ol dokta i was long ol mama i HIV pinis na ol i karim pikinini. Ol mama i karim 709 pikinini olgeta. Ol dokta i givim ART marasin long ol mama i HIV pinis. Sampela mama i stap longtaim long ART tasol, tu, i gat ol nupela lain na ol i kisim long taim ol i bel long 26 wik i go. Long dispela 709 pikinini, 8-pela i kisim HIV long mama; 6-pela i kisim long taim ol i stap long bel na tupela i kisim long susu bilong mama. i klia nau, ART marasin i save wok gut na i save was long mama na bebi wantaim! Na tu, i gat program bilong lukautim pikinini. Long stadi-program, mi stori long en, ol i givim ol nupela pikinini wanpela nevirapine na 4-pela wik ol i givim zidovudine.

Yumi kisim wanem skul long dispela?

Yu meri i HIV pinis - yu ken marit na karim pikinini.

Yu HIV pinis yu mas kisim ART marasin bilong was long bodi bilong yu.

Sapos yu dring ART long wan ful yia, bai yu redi long kisim bel na karim gutpela pininini.

I gat spesel program na marasin bilong lukautim ol nupela bebi.

No ken les o wok gut na i save was long gutpela pikinini!

Ol Katolik skul helpim Tapini sumatin wantaim gutpela edukesen

James Kila i raitim

MI BIN guria stret long taim mi tok "Gud moning" long sampela ol gret 4 na 5 sumatin long Tapini long maunten stesen bilong Goilala insait long Sentrel provins.

Bekim bilong ol dispela sumatin i kam bek long mi em smat tru. Ol i tok "Morning sir, how are you this morning in Tapini" (Moning tru, yu pilim olsem wanem tru long dispela moning long Tapini).

Yes, dispela kain bekim bilong ol sumatin long planti ples insait long PNG em bai yu hat long painim tumas. Planti sumatin bai sem na lap tasol na daunim het na ino nap toktok gut tumas. Tasol dispela ol yangpela sumatin bilong Goilala em ol smat moa yet.

Ol dispela sumatin i sindaun antap long tupela olupela masin, wanpela em olupela trakta na wanpela em olupela bulldosa masin arere long Tapini ples-balus. Ol i dispela mangi i bin go long lukim lonsing bilong 5-Yia Distrik Divelopmen Plen bilong Goilala.

Wanpela bisnis developmen opisa husat i wok longpela taim long Tapini stesin long bipo, Victor Aite i stori gut tru long mi olsem dispela ol sumatin em tingting bilong ol i op gut tru long lainim planti nupela samting. Na bikpela helpim tru Katolik Misin ejensi skul long Tapini i givim long helpim ol.

Mista Aite i tok olsem tupela Katolik misin skul em long Santu Pita



PILAI LONG TRAKTA: Ol sumatin bilong Santu Peter Torot i pilai long bagarap trakta arere long Tapini ples-balus long maunten bilong Goilala distrik. *Poto: James Kila*

Torot Memorial Praimeri skul na Tapini Hai Skui i givim gutpela save tru long ol sumatin long dispela longwe maunten ples long Tapini insait long Sentrel provins. Mi bin bungim ol dispela sumatin taim mi go long Tapini long las wik Fonde long lukim Memba bilong Goilala, Mathew Poia wantaim ol LLG kaunsela bilong em i putimaut o lonsim 5 Yia Distrik Plen bilong Goilala.

Mista Aita i stori olsem planti ol sumatin long Tapini i save lainim gut tru nupela samting long skul bikos ol Katolik misin i save givim ol gutpela edukesen tru long helpim ol dispela sumatin long rural eria. Olsem na Inglis bilong

ol sumatin i smat tru na ol i no save pret long toktok.

Em i tok ol skul long Tapini i stap long gutpela ples tru na gutpela kolwin i save givim gutpela tingting i go long ol sumatin long skul na kisim save. Dispela samting i helpim gut tru ol sumatin long kisim save gut na lainim planti moa nupela samting.

Bikpela hevi ol papamama na sumatin i save bungim em long sait bilong trenspot na rot. Planti taim long taim bilong ren i pundaun rot i save pas na papamama save painim hat long painim mani long peim skul fi na ol narapela samting long helpim pikinini bilong ol i go het long skul.

Amerika helpim ol PNG pikinini long rit na rait

OL PIKININI bilong PNG bai skruim save bilong ol long rit na rait na tok tenkyu i go long Embasi bilong Amerika (United States of America) i donetim o givim moa long 350 buk long las wik Fonde.

Antoinette Corbin-Taylor em meri bilong Teddy Taylor, Ambaseda bilong Amerika long PNG i bin givim ol nupela buk inap long 357 i go long Buk Bilong Pikinini Laibreri long 6 Mail long Nesanel Kapitel Distrik. Ol buk i bilong ol pikinini i stap long pri kindagaten skul level inap long Gret 6.

Taim Misis Corbin-Taylor i givim ol buk, em bin tok Amerika i lukim olsem ol pipel bilong em i bikpela samting na moa yet, ol turangu lain long sosaiti.

Olsem na em i autim tok amamas i go long Buk bilong Pikinini laibreri long mekim wankain wok long ol pipel bilong PNG na tok sevis bilong ol i gutpela tru.

Misis Corbin-Taylor i tok wanpela ogenaesen bilong ol wantok save na smatpela blekmeri i skul long yuni-

vesiti na kolis em i memba long en, em long han bilong Prins George's Kaunti Alumnae Sapta bilong Delta Sigma Theta Sororiti Inkoporetet (PGCAC) na fanding han bilong en em Prins Georges Kaunti Delta Alumnae Faundesen (PGCDF) i donetim ol buk bihainim wanpela krismas kad em i bin raitim salim i go long wanpela pren meri memba bilong ogenaesen long las yia Krismas. Dispela i bihain long Misis Corbin-Taylor i bin stap insait long wanpela seremoni long opim dispela 6 Mail Skul bilong ol Pikinini laibreri long las yia Novemba.

Misis Corbin-Taylor em i bin lukim olsem dispela em i wanpela bikpela samting we laibreri i mekim long givim ol kwaliti buk bilong helpim skulim ol pikinini long PNG long apim mak bilong rit na rait level bilong PNG.

"Long kad, mi bin tok olsem mi ting mi painim samting mi ken wokim long hia. Dispela em i projek mi laik wok na sapotim bikos mi bilip strong olsem maski long wanem hap bilong wol, bi-

hain taim bilong yumi i stap long han bilong ol pikinini," Misi Corbin-Taylor i tok.

Na em i tok pren na memba bilong PGCAC i bin tokim ol narapela memba na PGCDF tu husat i donetim ol bun i kam long helpim ol pikinini bilong PNG i skruim save long rit na rait.

Em i tok dispela faundesen em 22-pela meri i bin statim long yia 1913, tasol em i gro na nau em i gat moa long 200,000 blekpela meri i kisim skul long yunivesiti na holim ol bikpela wok. Na i gat han long Amerika, Inglan, Japan, Jemani, Vejin Ailan, Bermuda, Bahamas na Korea.

Tude, dispela praivet ogenaesen i no save wokim profit i givim helpim na sapot i go long lokol komyuniti long wol aninit long ol program i stap insait long ol komyuniti yet.

Misis Corbin-Taylor i tok ogenaesen bilong em bai skruim helpim bilong em i kam taim em i stap yet long PNG na bihain taim em i lusim kantri-



KISIM SETIFIKET: Wanpela long ol CLCP Pri skul tisa i kisim setifiket long han bilong Fokwea Pasto long Gerehu Stes 5 em Reveren Mike Field. *Poto: Veronica Hatutasi*

Trening long kamapim senis

Veronica Hatutasi i raitim

OL tisa i gat bikpela wok na save ol i givim long ol pikinini bai kamapim bikpela senis long kantri.

Pasto Mike Field bilong Living Lait 2 Fokwea sios long Stes 5, Gerehu long Nesanel Kapitel Distrik i tok olsem long greduesen bilong 57 Komyuniti Lening Senta Progre (CLCP) Pri skul tisa long las wik Fraide. Ol lain i greduet i bin kam long ol wan wan setelmen long Mosbi.

Dispela ol tisa bai givim sans long moa pikinini insait long ol setelmen long Mosbi, ol lain we papamama i dai o i nogat rot long painim mani long kisim skul na save.

Tisa trening program i bin kamap aninit long wok patna namel long mobail kampani Dijisel we i bin putim mani long ranim dispela trening na program wantaim Fokwea Sios na Komyuniti Divelopmen Dipatmen.

Pasto Mike i bin tokim ol tisa olsem "yupela i soim rot na wokabaut long lainim i go long ol pikinini husat em savelain na lida bilong yumi long bihain taim. Bihain taim bilong yupela i op, tasol yupela i mas lainim moa yet. Nau bai yupela i go bek long ol CLC komyuniti bilong yupela na givim sans long ol pikinini long lainim. Bihain taim i stap long han bilong yupela na ol pikinini i wet long yupela. Holim pasim ol samting we yupela i lainim".

Komyuniti Divelopmen Minista, Dame Carol Kidu i bin stap insait long Stej 6 greduesen long Gerehu i bin tok ol pikinini em ol namba wan risos bilong yumi na kantri.

Dame Carol i bin tok dispela em i bikpela de we ol lain i greduet olsem ol pri skul tisa i gat lewa bilong ol i op long givim save i go long ol pikinini.

"Wok yupela i mekim em i bikpela bikos yupela i helpim givim save i go long ol pikinini long taim we ol i mas stat long lainim. Taim bilong ol pikinini long stat lainim em long tai mol i stap long bel, mama i karim inap long ol i gat 8-pela yia. Planti pipel i no save o klia long dispela," Dame Carol i tok.

Dame Carol i bin kirapim Skulim ol Pikinini taim ol i Liklik yet program long ilektoret bilong em taim em i bin go insait long Palamen long 1997. Maski em i nogat inap mani, em i skruim program i go na program i stap nau long Mosbi Notis, Notwes, Rigo na Galp provins.

Em bin tok gavman em yet i no inap long skruim wok i go tasol em i amamas olsem ol sios, ol NGO na bikpela mobail kampani olsem Dijisel i wok patna wantaim long go hetim program we bai helpim long apim mak bilong rit na rait long PNG we i stap long mak nogut skelim wantaim wol na ol narapela Pasifik ailan kantri.

Man i makim maus bilong Dijisel Faundesendesen em Naus Kamal i tok amamas long ol tisa na dispela em i namba wan greduesen insait long Komyuniti Lening Senta Progre we Dijisel i sponsarim long em.

Em bin tok Dijisel bai sapotim ol komyuniti we em i lukim olsem ol i kirapim samting ol yet na mekim samting long helpim ol yet na karimaut wok. Em i tok Dijisel bai wok wantaim Fokwea sios, Komyuniti Divelopmen na husat moa long strongim wok patna na mekim wok long helpim komyuniti na ol pikinini i lukim ol gutpela senis.

Kristen sip bai karimaut wok misin na medikal long Galp Provins

Veronica Hatutasi i raitim

WANPELA Kristen grup bilong ol yangpela o yut i gat mikis long ol sios i stap insait long em bai i kam long wanpela sip long neks mun bilong mekim wok misin na givim fri medikal helt sevis i go long ol pipel bilong Galp provins.

Youth With a Mission (YWAM) em nem bilong grup husat i save mekim misinari wok long wol bilong helpim ol turangu lain na kisim Tok bilong God i go aut long moa pipel. Wanpela bikpela samting em ol i lukluk long em em long givim sans i go long ol yut long global o wol komyuniti long kisim lidasip trening na kamap ol gutpela lida insait long sios na komyuniti, Baibel tising na ol yut i ken kisim nem bilong

Jisas i go aut na planti lain i ken save long em.

Long dispela Sande 2 kilok apinun, bai i gat bung long Apex Pak long Boroko we ol lain i go pas long redim wokabaut bilong sip na grup bai toktok moa long dispela samting.

"Dispela bung i bilong sapatim YWAM husat i salim wok mari-mari na medikel sip long raun i kam na karimaut wok long Galp Provins. Ol bai wok stap long Galp provins long tupela mun, stat long Ogas na pinis long Oktoba," Joseph Ka'au, wanpela mausman long wok redi komiti i tok.

Em i tok bung bai kamapim awenes long wokabaut na tu, askim long ol donesen bilong sapatim dispela gutpela wok misinari na medikel wok long

Galp Provins.

Liklik stori bilong ogenaesen em YWAM grup i kam long PNG aninit long "Marine Reach Ships Ministry". Dispela em wanpela long ol planti ministri YWAM i gat long em.

Ogenaesen i bin statim wok long yia 1991 na em i wok long ol sip long Pasifik rijen na dispela em i namba 19 yia bilong em. Ol i raun pinis long 16 kantri na givim fri medikal sevis i go long moa long 200,000 pipel. Ol sevis ol i givim em long dentistry o sekim na stretim tit, ai, praimer i helt kea, sejikel, medikel saplais na ol hausing projek.

Long dispela yia, YWAM medikel sip i bin kam aninit long menesmen bilong YWAM Australia. Olsem na em i wokim plen

bilong em olsem namel long 5-10-pela yia, em bai givim helt kea sevis i kam long PNG na tu, ol yangpela pipel bilong Australia i ken mekim ol wok sevis insait long ol komyuniti.

Long PNG, ol bai wok insait long Galp Provins we ol sevis na ol haus sik, helt senta na etpos i givim i no gutpela bikos planti ol bilding we ol i bin wokim bipo yet em ol i bagarap pinis.

Olsem na dispela program bilong YWAM bai helpim long stretim sampela long ol hevi eria long helt sait.

Mista Ka'au i tok sip bai kamap long Mosbi long Ogas 4 long ol Kastom lain i sekim na lusim Mosbi i go long Galp Provins long Ogas 12. Na em bai stap na mekim wok long Galp provins long 9-pela wik.

Ol Katolik yut long Hailans holim wanpela wik reli

MOA long 600 Katolik Yut bilong 5-pela Hailans Katolik Daiosis i bin bung long wanpela wik long Namta Peris, Goroka Daiosis. Bung i bin stat long Julai 5 inap long de namba 9.

Long Sande Julai 4, olgeta i kam bung long YC Hall long Goroka taun na Mandé namba 6, 10-pela Dyna trak i kisim ol i go lusim ol long Miruma na ol i pre na wokabaut i go long Namta peris stesen. Bisop Francesco Sarego, SVD bilong Goroka daiosis i go pas long openim wanpela wik reli wantaim Santu Misa long Mandé.

Dispela em i namba 10 riginel yut reli i bin stat long 1993 long YC Hall long Goroka. Na muv i go long Fatima long Hagen long 1995, Par long Wabag long 1997, Kumin Long Mendi long 1999, YC long Goroka long 2001, Ulga long Hagen long 2003, Denglagu long Kundiwa long 2005, Pogera long Wabag long 2007, Tende long Mendi long 2009 na nau Namta long Goroka long 2010. Kundiawa daiosis bai hostim neks reli. Deit na taim ol Daiosis Yut Kodineta bai bung na makim bi-hain.

Ol Bisop bilong Hailans rijen i sapatim reli bikos em i strongim ol yangpela long bung wantaim na serim talen o gift ol i gat namel long ol yet. Na lainim nupela samting bilong strongim Kristen bilip na wokabaut bilong ol long laip. Lusim birua pasin, mariwana, les pasin na kamapim yuniti wanbel pasin na gutpela sindaun insait long rigin.

Het tok em "The Mission of the Twelve". Na dispela i pulim tingting bilong ol long lukim na glasim gen laip na mekim ol wok olsem disaipel bilong tude insait long sosaiti olsem Kristen Katolik Yut. Ol spika i givim ol gutpela toktok bilong strongim ol long stap gutpela modul o piksa na yusim gut taim na save bilong ol long mekim samting bai i ken givim mining long laip. Maski long raun nating na hangamap long papamama o ol narapela. Kamap gutpela lida na bringim lait namel long wanlain bilong ol long ples bilong ol.

Pater Chris em peris pris bilong Namta peris wantaim kristen komyuniti i bin redim ples gut tru na ol yangpela i amamas wantaim kainkain pilai bilong reli



Ol Wabag Yut talen nait.

olsem singsing, felosip, talen nait, kisim tok skul, Yukaris na pilai spot.

Bisop Anton Bal bilong Kundiawa Daiosis i go pas long pasim Misa lotu long Fraide na givim gutpela toktok long ol yangpela. Em i salensim ol yut bilong tude long lukautim gut laip na noken yusim krangi bikos ol bai go pas long sios na kantri long bihain

taim. Lukluk long Jisas taim ol i gat hevi na ol inap developim gutpela pasin na gro long kamap gutpela man o meri bihain.

Namta komyuniti i redim mumu bilong pasim bung na olgeta i amamas na tenkim God long reli i bin kamap gut na nogat bikpela hevi na problem i kamap long stap bilong ol long Namta.

Tok klia long Sientoloji

PRESIDEN bilong Konprens bilong ol Katolik Bisop bilong PNG na Solomon Ailan em Bisop Francesco Panfilo SDB i givim sampela toktok long kliarim ol askim we planti memba bilong pablik long PNG i gat long em.

Bisop Francesco i bin kisim askim sapos wanpela Kristen i ken wok wantaim ol lain Sientoloji.

"Nogat, mi givim dispela ansa bikos Sientoloji nau i kamap wanpela sios tasol ol bilip na prektis bilong ol i go agensim ol skul na stretpela pasin i stap insait long Nainel na Kristen tising," Bisop Francesco i tok.

Bisop Francesco i givim liklik histori bilong Sientoloji we man Amerika na raita, Lafayette Donald Hubbard i bin statim long

yia 1950. Bikman ya i no bin statim Sientoloji olsem wanpela rilijen o sios. Tasol em i bin raitim wanpela buk em i kolim long "Dianetics: the Modern Science of Mental Health". Dispela buk i bilong glasim tingting i stap gut na maski planti dokta bilong tingting i bin agensim, planti lain i bin ritim na laikim.

Tiori bilong Hubbard i no bin stop tasol em i skruim long toktok long ol Thetans, em ol sporti o tewel i no save dai na ol i gat pawa long ol samting i stap laip, spes na taim. Long katim stori i go sotpela, ol skul bilong em i no go gut wantaim ol i stap long Baibel we God em i mekim olgeta samting na yumi luksave long God olsem emm i antap long olgeta manmeri na ol angelo samting long

graun na even.

Bisop Francesco i tok tasol taim ol yia i go, Sientoloji i kamap olsem wanpela rilijen olsem em i gat seremoni long givim nem long pikinini, holim ol marit seremoni na funerel long ol i dai. Em i gat odinesen bilong ol minista tu.

Bisop Francesco i tok long stat yet bilong em, Sientoloji i olsem wanpela misinari muvmen we i go long olgeta kantri, mekim ol sariti wok olsem lukautim ol lain i kisim drag na ol kriminel long kamap orait bek we ol i yusim rot bilong ol yet long saientoloji long stretim ol lain.

Bisop Francesco i tok ol lida bilong Sientoloji i wok long pait longpela taim long sys-



MEKIM GUT, KISIM BLESING

SAMPELA taim yumi gat visita i kam long haus o wok ples bilong yumi na ol i no toksave pastaim. Mi bilip olsem sampela bilong yumi bai amamas tasol sampela bai nogat. Sapos yumi amamas, yum save givim buai o smok, wokim ti o kopi o kukim kaikai na givim ol. Sapos yumi i no amamas, yumi save pulim nus tasol.

Dispela em i pasin bilong yumi, manmeri bilong graun. Yumi luksave o nogat, samt- ing i save kamap long laip bilong yumi.

Wanpela samting yumi mas tingim oltaim em i olsem, dispela pasin bilong mekim gut long ol narapela manmeri i bin stap taim God i bin putim namba wan man na meri long dispela graun. Em i wanpela gutpela Kristen pasin. Bikos olgeta gutpela wok yumi mekim long helpim narapela i save bringim blesing long yumi tude o long bihain taim.

Las wik Sande Julai 18, 2010, mi bin wokim namba wan Misa long Hanuabada em nupela peris bilong mi. Mipela i bin ridim stori bilong Abraham na Sarah i mekim gut long tripela man ol i no save long ol. Tupela i lapun pinis na i no nap karim pikinini moa. Bikos ol i bin mekim gut long dispela tripela man bilong narapela lain, ol i bin kisim blesing. Sarah em i lapun pinis tasol inap long karim wanpela pikinini.

Tingim! God laik kam long yumi olgeta taim. Em i kam long visitim yumi long TOK bilong em long Buk Baibel na em i kam lukim yumi long Sakramen bilong Sios. Em i kam visitim yumi tu long manmeri bilong narapela ples.

Yum i luksave long dispela o nogat?

Yumi save givim gutpela bekim olsem Maria bilong Bethany i sindaun long lek bilong Jisas na i harim em? O yumi bisi tumas long kain kain wok bilong dispela graun na lusim tingting olgeta long visitesen bilong em?

God i putim yumi long dispela graun bai yumi ken wokim tupela wok wantaim, PREA na WOK. Wok na prea tupela i mas wokabaut wantaim o stap balans.

Lainim gutpela pasin bilong Abraham (Genesis:18:1-10) na Maria (Luke: 10: 38 - 42). Yumi welkamim God long TOK bilong em na long Sakramen bilong em. Planti Katolik manmeri i save welkamim God long Tok bilong em tasol. Ol i lusim tingting long welkamim em long Sakramen, na moa yet long santu Komyunio - we Jisas i kam na stap insait long lewa bilong yumi.

Tingim gut!

God i laik kamap visita bilong yu olgeta de. Olsem na stap redi oltaim long mekim gut na welkamim em. Mekim gut long olgeta manmeri - moa yet long smail bilong yu. Taim yu givim smail long wanpela man o meri, yu givim smail i go long God. Smail bilong yu i mekim em i amamas na pilim welkam insait long haus bilong yu o wok ples bilong yu.

Smail em i fri. Olsem na yu noken pret long yusim. Yusim smail bilong yu long wanpela taim long wanpela de.

tem bilong ol i kisim luksave olsem wanpela rilijen na kisim ol gutpela samting olsem noken baim takis.

Em i tok ol kantri olsem Amerika, Itali, Sweden, Potugel, Kroesia na Hangari i givim luksave long Sientoloji olsem rilijen long sait bilong ligel o lo taim ol narapela kantri olsem Kanada, Yunaitet Kingdom, Frans, Jemani, Gris na Beljam i no givim luksave.

Em i tok stat yet long Sientoloji i kamap, em i stap long birua wantaim ol gavman na ol polis bilong sampela kantri olsem Amerika, Yunaitet Kingdom, Kamada, Frans, Jemani na Australia. Em i wanpela rilijen tude we i gat planti keis agensim ol gavman, ogenaesen na ol wan wan man.



FRANS GIVIM LUKSAVE: Ambaseda bilong Frans long PNG, Allan Waquet i putim medol long Ambaseda Lucy Bogari long taim bilong makim nesenel de bilong Frans las wik Trinde. *Poto: James Kila*

Ambaseda Bogari kisim 'Frans Nesenel Oda' medol

James Kila i raitim

WANPELA meri husat i wok longpela taim tru olsem diplomat o meri i makim Papua Niugini long ol PNG Foren Afes opis long wol, Ambaseda Lucy Bogari, long las wik Trinde i kisim bikipela luksave i kam long gavman bilong kantri Frans.

Long makim Nesenel De bilong Frans long las Trinde, gavman bilong Frans i givim wanpela medol ol i kolim 'Frans Nesenel Oda' i go long Ambaseda Lucy Bogari. Dispela medol em Frans ambaseda i kam long PNG, Al-lain Waquet i givim i go long Ambaseda Bogari long makim presiden bilong kantri Frans, Nicolas Sarkozy.

Ambaseda Bogari, em wanpela meri bilong Oro provins na em i wok longpela taim tru insait long intanesenel foren opis makim PNG gavman long ol kantri long Yurop, Saut Korea, Nu Silan na sampela moa.

Narapela meri long PNG husat i bin kisim wankain medol long pastaim em Minista bilong Komyuniti Divil-opmen, Dame Carol Kidu.

Ambaseda Waquet i tokaut olsem givim medol na luksave long Ambaseda Bogari i soim olsem kantri Frans i go het long strongim wok bilong en wantaim ol narapela kantri insait long rijen na wanpela meri husat i mekim dispela gutpela wok long rijen em Ambaseda Bogari.

Em i tok amamas tu olsem Ambaseda Bogari long taim bilong em olsem embeseda i go long Frans na na ol narapela kantri long Yurop taim em i wok long Brussels i save mekim gutpela wok rilesens wantaim kantri bilong em.

Em i tok Bogari i go pas tu long promotim PNG kastom long Frans na long wankain tu em i promotim kalsa na pasin kastom bilong Frans na gutpela wok rilesins long PNG.

Ambaseda Bogari i bin werim wanpela klos i gat naispela kala bilong Oro tapa klos taim em i kisim medol bilong em na tu em i bekim ol toktok gut tru long tokples Frens.

Dispela strongpela meri bilong Oro provins i go het yet long wok olsem presiden bilong Frens Alaiens long Mosbi.



Ol famili i amamasim Sarere long Kantri Klab nau i sindaun lukim ol lain wok manmeri i putim kamap ol singsing bilong ol. *Potos: Veronica Hatutasi*



WINNERI: Jennifer Joseph i bin kisim namba tu ples na prais long G4S famili bung na singsing resis taim

G4S Famili bung na singsing resis i go gut ...Autim save yu ting yu nogat

Veronica Hatutasi i raitim

FAMILI bung wantaim em wanpela bikipela samting na wanpela kampani i luksave long dispela na i mekim samting long amamasim ol woklain n a ol fa,ili bulong ol.

I kamapim taim long wiken long ol woklain na ol famili bilong ol long bungim ol narapela famili bilong ol wanwok bilong ol na save stori wantaim wanpela narapela.

Long dispela rot, ol i ken save gut long wanpela narapela taim ol i sindaun stori wantam, dring sof o strongpela dring, ol pikinini i pilai i stap na olgeta i sindaun na lukim sampela ol samting we ol woklain i putim kamap.

G4S (G4S Secure Solutions (PNG) Limited), wanpela kampani we nem bilong em i wok long kamap bikipela nau long PNG em dispela kampani we i holim ol bung bilong ol famili long ol woklain bilong em long ol potnait Sarere long Kantri Klab long Mosbi, stat yet long Jun 26 long dispela yia.

G4S Sekyuriti kampani em i wanpela intanesenel sekyuriti kampani i stap long sampela ovasis kantri long wol. Em i stap long Mosbi na long sampela ol narapela provins.

Tupela as tingting long holim ol dispela famili bung em long bungim ol

woklain bilong ol famili wantaim long save long wanpela narapela na gat gutpela de. Narapela em long autim ol save we ol woklain i gat ausait long wokples. Olsem na ol i holim G4S singsing resis we husat wok manmeri i ting em inap long singsing i ken go long fran wantaim maik na singsing. Na long namel bilong ol resis lain i putim kamap singsing bilong ol, ol pikinini na hauslain bilong ol G4S woklain i putim kamap ol tumbuna singsing na danis. Tupela pipel i kamap namba wan na tu long ol lain i go insait long singsing resis i winim prais. Tripela jas i glasim na skelim ol lain i singsing na givim prais long tupela i kamap namba wan na namba tu.

Meri Wantok i bin stap long Kantri Klab taim namba tu singsing resis i bin kamap long Julai 10. Em i lukim ol woklain wantaim ol famili bilong ol i miks nabaut toktok, stori na isi isi dring sof o strongpela dring o wain. Na ol pikinini i gat gutpela taim tu long swimming pul na pilai long ol siso na swing long eria yet bilong ol pikinini insait long Kantri Klab yet.

Tasol taim 6-pela woklain we tripela long ol em ol meri i go long fran na putim kamap ol singsing bilong ol, olgeta manmeri na pikinini i sindaun lukluk na amamas long harim na lukim

olsem yesa, i gat ol sampela wanwok husat i gat gif long singsing.

Long Julai 10 famili bung na resis, wanpela yangpela meri Milen Be sekyuriti em, Jennifer Joseph, i bin kisim namba tu prais taim Henry Dick em hap Bogenvil na Sentrel provins i bin kamap gut tru long ol 6-pela i bin go insait long resis long kisim namba wan prais. Long namba wan resis i bin kamap long Jun 26, tupela meri i bin win. Em long Halle Kaia De Willie na Dorcas Raga. Fainol na wanpela wina long G4S PNG lain bai kamap bihain long wanpela wina bilong ol wan wan G4S brens long PNG bai sanap resis wantaim na ol jas i makim wina. Wina long dispela taim bai go long rijinel resis bilong G4S Esia na Pasifik rijen bai kamap long kantri Tailan (Thailand) long mun Oktoba dispela yia.

Plantu woklain i lukim olsem dispela kain resis na bung bilong ol woklain bilong kampani na ol famili bilong ol i gutpela na strongim pasin bilong famili na kampani i stap wantaim na wok bung gut wantaim long kamapim gutpela samting. Na tu, ol famili i rileks o stap amamas wantaim ol famili, woklain na bungim ol nupela poroman insait long ol G4S famili yet. Namba tri famili bung na singsing resis bai kamap long dispela wiken Sarere, Julai 24.

Proma i helpim gut ol meri ... Givim strong na save

Veronica Hatutasi i raitim

PROMA em wanpela eria we plantu meri long PNG i go insait long em na nau ol i kamap ol gutpela bisnis meri . Tu salim ol Proma prodak i helpim ol long lukautim ol famili bilong ol.

Ol proma prodak em ol kwaliti prodak i gat wok long tupela eria. Namba wan em ol Optimum Helt prodak long sait bilong helpim helt na gutpela stap bilong manmeri . Na namba tu em long ol kwaliti prodak bilong lukautim skin olsem ol Grace prodak.

Ol meri i stap insait long Proma long PNG i save holim nesenel anuel bung bilong ol long mun Novemba olgeta yia.

Agatha Miskaram em wanpela mama i wok wantaim Proma Prodak long 10-pela yia nau. Em i lukim ol gutpela samting i kamap taim em i stap olsem Proma memba na salim ol Proma prodak i kamapim long en.

"Go insait long Proma i helpim mi gut long sait bilong helt bikos em i sotim wokabout bilong mi long go long haus sik. Long plantu taim ol pikinini i sik, mi givim ol helt optimum prodak na ol i kamap orait. Mi yet tu i kisim ol prodak long stap fit na helti.

"Tu, salim ol Proma prodak i helpim mi long kisim mani we i helpim mi long baim skul fi na ol narapela samting bilong lukautim mi yet na famili bilong mi. Na tu long

sait bilong netwok o poroman wantaim plantu ol narapela meri i stap insait long Proma.

"Go insait long proma mi kisim trening na mi gat "confidence" o i no pret long toktok long ai bilong plantu lain. Nau mi ken wokim trening namel long 50-60 pipel hia long Mosbi yet na ausait long ol narapela provins. Long sait bilong trening, mipela i kisim skul long ol kain prodak, bilong yusim long wanem samting bikos i gat ol helt prodak na ol dispela bilong lukautim, kamapim na mekim skin i luk na smel nais," Agatha i tok.

Agatha i tok tu olsem Proma Systems long PNG i gat wanpela skul em i bin sapotim wantaim mani samting long kirapim

long Laloki. Em long Vincent de Paul's skul we ol Sen Joseph's Sister kongrikese i lukautim na ranim i stap.

Em i tok em bin stap long haus lukautim famili i stap tasol taim em i go insait long Proma, laip bilong em i bin senis long kisim na lainim sampela gutpela samting.

"Mi amamas long tokaut olsem nau mi gat bilip long mi yet olsem mi ken sanap long ai bilong plantu lain na toktok. Na go aut long givim skul o trening i go long ol narapela long Mosbi na long ol narapela provins tu,"Agatha i tok.

Em i tok em bai stap wantaim Proma Systems bikos em i wanpela eria we i kontribut long ol wok developmen bilong ol meri, famili, komyuniti na kantri.



TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(kHz)
7pm - 8pm 5995; 6020; 9710; 1280(kHz)

Tenpela Pasifik Ailan kantri holim toktok long Fiji

TENPELA Pasifik Ailan kantri i tokaut pinis olsem ol bai stap insait long ol bikpela toktok long Fiji, long dispela wik.

Lida bilong Papua Niugini, Solomon Ailans, Kiribati na Tuvalu nau i wok long stap long miting wantaim ol delegesen i kam long sevenpela arapela ailan kantri.

Ol i bin laik holim ol dispela toktok bilong kisim ples bilong wanpela

Melanesian Spiahet Grup samit, ol i bin stopim bihian long Sia bilong MSG, Vanuatu Praim Minista, Edward Natapei, i bin tok bai gat ol hevi i kamap sapot lida bilong Fiji, em pipel i no bin ilektim em, i kamap sia bilong dispela grup.

Fiji i tok, namba bilong ol kantri i stap long dispela miting long dispela wik, i soim strongpela sapot em Suva i gat long ol hap long Pasifik.

Intarim Praim Minista bilong Fiji, Frank Bainimarama, bai toktok wantaim ol ailan lida long dispela wik long go het bilong Fiji

Rotmep bilong Demokrasi na Stratejik Fremwok bilong Senis.

50 pipel i dai long India long birua bilong train

OL atoriti long India i tok, ol i pulim aut pinis dai bodi bilong planti manmeri long tupela tren em i bin bam long biknait long isten sait bilong kantri.

Niusmeri Sally Sara i ripot olsem, samting olsem 50 pipel i bin dai, na planti handret moa i bin kisim bagarap.

Wanpela ekspres tren i bin spid na ron

stret i go long baksait bilong narapela tren, long Sainthia stesin long West Bengal.

Dispela birua i bin kamap long bikmoning stret, taim planti long ol pasindia i bin wok long slip yet.

Ol imejensi wokman, i kisim aut pinis planti bodi i kam long hap we ol tren i bin bam long en, 200 kilomita not bilong Kolkata.

Tasol planti pipel i stap pas yet insait long ol tren na polis i ting, namba bilong pipel i dai bai go antap.

Ol rail opisal i tok, ol i no save wanem samting stret i bin kamapim dispela birua.

Australian PM i wokim kempein long Not Kwinslen

PRAIM Minista bilong Australia, Julia Gillard, i lusim namba tu de long not is Kwinslen, bilong wokim kempein insait long wanpela majinal sia bilong Townsville.

Danny Morgan i ripot olsem Julia Gillard bai lusim moa taim long not na fa not Kwinslen, we Labor i gat wanpela grup bilong ol majinal sia long long difendim na i bilip long winim ol sia olsem Herbert long Townsville.

Mis Gillard i bin wokim kempein wantaim Kendidet bilong Labor, na bipo lokol meya, Tony Mooney, husat i bin winim pri sileksen wantaim strongpela sapot i kam long bipo praime minista, Kevin Rudd.

Mis Gillard i no bin mekim ol nupela promis long spendim mani, tasol sans bilong ol i bin kamap gut bihain long wanpela preferens dil wantaim Grins pati.

Resis long eleksen long Australia bai klostu stret

PRAIM Minista bilong Australia, Julia Gillard i tok, federal eleksen bai kamap long dispela mun, bai kamap klostu tru.

Wanpela opinion pol ol i bin putim aut long nait i go pinis i bin painim namba bilong sapot long tupela bikpela pati i stap klostu stret.

Tasol narapela polo l i bin putim aut i soim olsem Mis Gillard i wok long go pas long ten poin long Kolisen.

Mis Gillard i wok long tok yet, dispela resis namer long pati bilong em na Oposisen bai stap klostu stret.

Lain Oposisen gat sapot long putim ol asailum sika long Nauru

BIKPELA oposisen pati long Australia i soim pinis sapot bilong em long opim gen senta bilong ol asailum sika long Pasifik Ailan bilong Nauru.

Foren Afes mauseri bilong Oposisen, Julie Bishop, i tok em i sapotim tingting long opim gen wanpela ditensen senta long Nauru, bipo gavman bilong John Howard i bin yusim.

Australia i bin putim 12 handret ol asailum sika long Nauru, em i bin wanpela hap long dispela ol senta ol i bin kolim long Pasifik Solusen.

Ol i bin pasim dispela senta long Nauru long 2008.

Praim Minista Julia Gillard i gat tingting long wokim wanpela nupela rijinel prosesing senta, na i bin tok, em i bilip long winim sapot bilong Is Timor long wokim long hap.

Tasol Mis Bishop i tok, em bai orait wantaim tingting sapos Kolisen i tingting long go bek na bihainim dispela 'Pasifik Solusen'.

20 pipel i lus bihainim wanpela graun bruk long Saina

SAMTING olsem 20 pipel i lus yet bihainim kamap bilong wanpela graun bruk, em i bin karamapim hap bilong wanpela viles long Angkang siti long Noten Saina.

Ol reskiu wokman i wok long painim yet ol dispela pipel, bihainim kamapim bilong ol disasta i bin kamap long Saina insait long ol dispela mun i go pinis.

Pundaun bilong bikpela ren insait long ol wik, i bin kamapim tait wara na ol graun bruk na bikpela wara i pulumapim stret Three Gorges Dam.

Ol enjinia i wok long opim wara i kam long dem i go long Yangtze riva bipo long kamapim bikpela wara i kam long tait wara, sampela taim bihain long dispela wik.



OFFICE OF HIGHER EDUCATION

PABLIK NOTIS 2, 2010

TEKNIKAL NA VOKESINAL EDUKESIN NA TRENING SKULS SKOLASIP PROGEM (TVETSSP)

Dispela em wanpela notis we kam bihain long Nambawan Pablik Notis we iron long Epril 19 i go Me 7th 2010. Notis long nambawan taim i go aninit long taitel Teknikal Skills Skolasip. Nau Progrem ya ol i kolim Teknikal na Vokesinol Edukesin na Trening Skills Skolasip Progrem (TVETSSP).

Edvataismen ya i pulim planti ol lain long PNG long planti long ol 22 provins na 89 distrik, olsem ol skul liva, ol lain husat i wok na ol lain husat i pinisim skul pinis long yunivesiti. Planti ol lain husat i aplai na jeneral pablik i wok long askim long wanem samting i kamap bihain long dispela, olsem na OHE i laik toksave long ol pipel bilong PNG olsem dispela progrem i ron orait yet. Mipela i wok long ol bikpela eria bilong wok pastaim long mipela i ken tokaut long nambawan ol lain bilong 2011. Sampela ol bikpela eria long luksave ino bin stap long nambawan projek eria long lukluk long en na mipela i redi long toksave olsem mipela i wok long en nau na ol selesin bai pinis long mun Ogas na ol nambawan lain bai igo skul long stat bilong 2011.

Long kamapim na mekim redi ol pes grup long go skul long yia 2010 ino inap long kamap bilong wanem mipela nau i wok long stretim planti ol samting long polisi sait na ol sampela hevi olsem:

1. Bod na Lodjing (Ples bilong silip na stap long taim blong skul)- karamapim ples bilong slip, pastoral kea na ol narapela samting.
2. Bung toktok wantaim ol Lokal Gavman na ol TAFE Koles husat bai lukautim yu na wanem Trening Ogenais esin we i rejista long lukluk i go insait long wanem gutpela rot long lukautim ol treinis.
3. Kodinesin na Komunikesin em bikpela samting long lukim olsem stekholdas insait long TVETSSP i bihainim wankain rot, bikos dispela em nupela progrem Gavman bilong PNG i kamapim.
4. Ol narapela progrem bilong ol sumatin long luksave long ol pasin tumbuna na save gut na amamas long en.
5. Fainens sapot i bihainim wanem kain kos na wanem rot em bai kam na wanem hap treini bai stap na bai go long karamapim ples em i stap long en na ol narapela eria fainens bai go long en. Dispela bai go wantaim Bod na Lodjing, Tusen fi industrial ekpiriens, utilities, Insurens, Menesmen na Kodinesin, pat-taim wok, wanem wan wan samting sumatin bai mekim, benking na ol narapela samting.
6. Pepa wok long Imaigesin na Visa Kategori long go wantaim wanem ol trening na wanem kain ol mak bilong kos stret long ol dispela TAFE koles.
7. Polisi, Prosidja, Gaidlain na Protoko long karimaut ol progrem stat long 2011.
8. Wanem Taim ol Progrem bai stat. Sampela ol kos bai ron long 6-pela mun, na ol arapela em 12 mun na 18 mun.
9. Ol TAFE na ol Trening Ogenaisin i gat Luksave long en.
10. Studen Welfea luksave long sait bilong sapot, pastoral kea, ples bilong slip, infomel lainim bilong ol student, disaplun na ol narapela samting ol student bai mekim.
11. Ofis i wok long progrem wantaim ol lain atoriti long Australia long olgeta de long stretim ol dispela samting.

Plis oltaim ringim ofis bilong mipela long sekim TVETSSP long feks: 3258387 o Telefon: 3012095 na 3012052/58 bipo long 4.06 pm long Mande i go Fraide.

Tok-orait i kam long:

William Tagis, PhD

Dairekta Jeneral bilong Ofis bilong Haia Edukesin





Jada 2010

WANTOK
KOMENTRI

Mani, namba na gridi pasin

DISPELA tripela samting em yumi PNG nau i lukim i stap insait long wok politiks bilong gavman yumi gat tude.

Las wik i kam inap dispela wik, yumi lukim Dokta Puka Temu, wanpela sinia ministra na memba bilong Nesenel Alaiens i lusim pati na gavman na bungim han wantaim ol memba bilong oposisen.

Namba wan bikpela astingting em i autim long mekim dispela, i stap wantaim pasin nesenel alaiens na Praim Minista Se Michael Somare i mekim, we em i wok givim pawa bilong holim, skelim na lukautim mani long han bilong tripela man tasol.

Wanpela bilong ol em pikinini bilong em Arthur Somare, memba bilong Angoram.

Bihain long Dokta Temu i bin suruk i go longwe long Nesenel Alaiens, planti toktok i kamap long ol arapela biknem memba na ministra bilong NA, husat i wok long toktok wantaim Temu na oposisen long bung wantaim ol.

Ol lain gavana bilong ol provins, husat NA i wok long abrusim ol wantaim ol Distrik Sevises Impruvmen Progem mani bilong ol, i bin givim tingting olsem ol tu i les pinis long pasin NA na praim ministra i mekim long ol.

Tasol long las minit, taim Dokta Temu na oposisen i laik kirapim vot i nogat bilip agensim Se Michael, lek bilong ol dispela lain i bin hevi tumas long ol i apim na wokabout lusim gavman.

Sapos yumi no harim ol dispela stori, bai yumi tingim tasol olsem ol dispela memba, na planti ol arapela koalisen pati memba tu, em ol i gat bikpela gridi pasin tumas.

I ken i gat wan wan ol memba husat i bihainim bel na lewa bilong ol, na lusim ol lain i mekim pasin nogut bilong traime sinisim sindaun bilong politiks long kantri bai kantri i painim gutpela taim, tasol tupela yia bipo long ileksen long 2012, na ol i tingting planti tru long ol projek ol i no kirapim yet bilong pipel na ol vota bilong ol.

Nau gavman i amamas olsem em i abrusim pinis vot i nogat bilip long praim ministra. Ol i tok ol i sindaun strong, na luksave bilong spika, husat em i wanpela gavman na NA memba tu i no moa stap ples klia olsem wanpela independen man.

Oposisen nau i tok i gat rot i stap yet long kirapim bek palamen wantaim tok orait bilong Gavana Jeneral, bai ol i ken traime mosen bilong vot i nogat bilip.

Ol i ken mekim olsem.

Tasol sapos i gat wanpela bikpela lain manmeri husat i wok long lukluk, na nau i no wanbel liklik long pasin dispela gavman i mekim, em ol pipel bilong PNG. I save gat mak bilong olgeta samting long ples graun. Na taim yumi abrusim dispela mak, husat i save wanem kain hevi bai kamap?

Wanem as bilong vot nogat bilip?

VOT nogat bilip long gavman bilong Somare i wok long kirapim bel bilong planti ol memba bilong palamen nau tasol sapos ol memba insait long gavman i sanap strong bai ol inap long winim dispela salens na holim gavman go inap long 2012 nesenel ileksen.



2005 nesenel ileksen we Sir Michael Somare na pati bilong em Nesenel Alaiens (NA) bin win na kamapim gavman.

Bart Philemon bin stap olsem klostu 20 krismas long palamen na em klia gut tru long ol rot na kain pasin we i save kamap long taim bilong vot nogat bilip.

Planti ol memba long Gavman nau em yangpela na nupela lain long kain pasin bilong vot nogat bilip olsem na ol bai sanap tasol na skelim gut wanem kain eksen na disisen ol bai mekim long dispela taim. Sampela yangpela lida i tokaut pinis long ol bai sanap strong wantaim Somare na holim Gavman inap 2012.

Dispela samting nau i go bek long namba gem nau. Wanem sait kisim moa namba bilong ol memba, em nau ol bai kamapim Gavman. Yumi save pinis

em taim nau bilong grisim na pulim ol memba go kam. Oposisen na Gavman bai stap long kem nau na salim walis go kam long pulim ol memba na holim namba mak long 57 na moa. Sapos wanem sait gat dispela namba o moa, em ol inap kamapim Gavman o holim Gavman yet.

Wanpela lain husat save gat pawa long dispela taim bilong vot nogat bilip em ol lain long namel we ol save kolim ol yet bek bensa. Ol dispela lain em ol stap long Gavman o Oposisen tasol ol save sindaun long namel bikos ol nogat wok minista o ol les long tok pait planti long sampela bikpela toktok bilong Gavman na Oposisen. Ol laik stap namel lain tasol. Dispela lain nau em ol gat pawa. Gavman na Oposisen mas grisim ol gut tru long kisim ol. Sapos ol tok long ol laikim wok Minista o ol laikim projek bilong ol long ples i mas kamap hariap, em taim bilong Gavman na Oposisen long harim tok bilong ol nau.

long strongim Gavman bai Gavman noken senis nabaut. Em ken stap gut na kamapim gut ol plen o polisi bilong ranim kantri. Tasol nau dispela Lo i raus pinis. Em taim bilong salensim Gavman nau.

I gat bikpela nogut long dispela bikos nem na bisnis bilong kantri bai i no inap ran gut taim Gavman i senis. Tasol sapos ol lain husat laik senisim Gavman i gat gutpela na strongpela plen na rot stap bilong ranim Gavman orait, ol ken go het. Olgeta samting ol lida i mekim em bilong gutpela na nogut bilong kantri tasol.

Sapos Oposisen laik senisim Gavman nau, orait moabeta olm as tokaut klia long ol pipel bilong Papua Niugini wanem bikpela samting tru ol laik kamapim bilong gutpela senis na gutpela developmen bilong dispela kantri.

Vot nogat bilip i no nupela samting long PNG. Tasol planti samting i no save kamap gut long kantri taim dispela senis i kamap.

Intagrity Lo bin kamap

WANTOK
 Published Weekly, Thursday, for Word Publishing Company, Ltd.
 P.O. Box 1982, Boroko, NCD
 Papua New Guinea
Telephone: (675) 325 2500
Fax: (675) 325 2579
Email: editorial@wantok.com.pg
Pe bilong wanpela yia 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
 Elizabethi Koroga

Editor
 Neville Choi

Published at
 Section 58, Allotment 3
 Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.

Wolnius long poto...



OPIM DUA: Ol niusmanmeri i kisim poto long bikpela hap wara i sut i kamaut long ol dua bilong Three Gorges Dam long Yichang long Hubei provins long sentral Saina long Tunde dispela wik. Ol reskiu wokman i wok painim 30 pipel graun i bin bruk na karamapim ol bihain long bikpela ren i pundaun na brukim graun. *(AP Poto i kam long AAP Images)*



WARI: Ol pipel long saut wes Saina i sanap na was long mak bilong wara bi-long Yangtze riva. Mak bilong wara inapim 188 mita antap long mak bi-long solwara. Dis-pela em i winim waramak long 1981. *(EPA Poto i kam long AAP Images)*

I NO PUKPUK YA: Wanpela 4.1 mita solwara pukpuk em ol i holim em bihain long em i pas insait long wanpela trep long Darwin Harbour long Tunde dispela wik. Noten Teritori Paks na Wail laip Sevis wasman, Robie Risk, i tok em i namba wan bikpela pukpuk ol i rausim long Darwin Haba long 2010. *(AAP Poto i kam long AAP Images)*



PASIM ROT: Long wanpela de long Jemani, ol i save pasim wanpela bikpela rot bilong ol nem bilong en Germany A40. Las wik Sande, ol i mekim dispela long makim 'Still Life'. Taim ol i sanapim 20,000 tebol long mekim namba wan bikpela kaikai long wol. Samting olsem wan milian turis na as-ples bilong Jemani i bin kam bung long Sande namel long ol siti bilong Dortmund na Duisburg long Jemani. *(AP Poto i kam long AAP Images)*

Wantaim
Dr John Mua



Kamapim Bikpela Senis long Rot bilong Yumi

GREN Fainol sans bilong ol draiva go bikpela taim ol lain mekim asua kisim 'ret kat'

Rekot bilong mipela long MVIL long ol PMV draiva husat ino inap moa stap insait long kompetisen bilong PMV NRL Draiva Kompetisen i soim olsem i mas gat senis i kamap long lo long sait bilong rot sefti long kantri.

I kam inap long pinis bilong mun Jun mak olsem 194 PMV draiva ino inap moa stap long kompetisen, o ol i kisim 'Red Kat' na ol i lusim olgeta sans bilong ol long stap insait long kompetisen long dispela. Ol bai ino inap long go lukim NRL Gren Fainol long Sydney. Narapela 158 draiva i kisim tok-lukaut pinis na ol i kisim 'Yelo Kat' na ol i stap long bikpela lukaut nau insait long 3-pela moa mun i stap long kompetisen.

Wanem samting mi guria stret long lukim em namba bilong ol draiva mipela i rausim ol long kompetisen we i bikpela tru long mak olsem 193 na 194. Ol dispela lain i rejista long kompetisen insait long Mosbi eria. Dispela mak nogut i go tu long ol draiva husat i kisim yelo kat, maski i kisim tok-lukaut tasol. Namba bilong ol lain husat i kisim yelo kat long NCD na ol ples arere em 112 namel long 158 ol draiva. Narapela 46-pela e mol bilong ol narapela provins long PNG.

Taim mipela i putim liklik namba bilong task fos tim long mekim wok long holim-pas planti ol draiva husat i mekim pasin nogut na brukim lo i soim olsem i gat planti namba tru bilong draiva husat ino draiv gut na i ken kamapim birua. Olsem na polis i ken rausim ol long rot bikos ol i kamapim prèt long pablik sefti.

Mipela mas tingim olsem mipela i

holim-pas ol draiva tupela taim olsem na mipela i givim red-kat. Ol dispela wantaim yelo kat em mipela i holim-pas ol wanpela taim. Tasol long sampela taim mipela i givim yelo kat na bihain ret kat long dispela ol seim draiva namel long hamas de tasol.

Dispela ol ripot ino gutpela tru na ol dispela draiva husat i bikhet em nogat ples bilong ol i stap long ol rot bilong yumi. Mi bilip olsem bikhet pasin bilong ol long brukim rot sefti lo na kamapim prèt long ol manmeri bilong kantri i soim olsem mipela mas rausim laisens bilong ol na polis i mas holim pasim ol.

Long as-ting bilong NRL Draiva Kompetisen, MVIL i go pas long nambawan rot long yusim ol spit-dan na masin long testim win bilong ol lain draiva i yusim rot long sekim sapos ol i dring na draiva o nogat. Na wok bilong mipela i go hat gen taim task fos i painimaut long narapela ol hevi ol draiva save kamapim.

Mipela i ino inap holim-pas na putim ol draiva long kalabus, na rausim laisens bilong ol o tokim ol long peim rong bilong ol. Lo i ken stretim wok bilong ol atoriti long pawa long karimaut wok bilong ol long mekim dispela.

Olsem na mi laik tokim ol dispela draiva husat i stap yet insait long kompetisen, olsem Stap Strong na bihainim lo bilong kompetisen. Sans bilong yupela long win i kamap gut olgeta de taim ol bikhet draiva i mekim asua na go aut long kompetisen.

Dr John Mua em Menesing Dairekta bilong Motor Vehicle Insurance Limited, husat i kamapim "Rot Sefti: Emi no wanpela Pilai" pablik aweanes kempain.



ABURUSIM BIRUA: Noken spid tumas taim yu holim stia

SPITIM KAR em ino wanpela PILAI



NOKEN SPITIM KAR

STAP WANTAIM GEM PLEN BILONG YU NA SPIT LIMIT

Spitim kar em wanpela long ol bikpela asua tru we i save kamapim birua long rot insait long PNG NA save lukim planti pipel i dai. Sapos yu spitim kar yu bai gat bikpela sans long bungim birua na kilim yu yet o narapela lain. Em taim nau long tingting strong long ROT SEFTI – em ino wanpela PILAI



60
km/h

Insait long taun o sain i soim

75
km/h

Long ol Haiwe o sain i soim

SAPOS OL I HOLIMPASIM YU BAI YU PEIM MANI O GO LONG KALABUS

ROT SEFTI em ino wanpela PILAI

A road safety initiative by





Poto i soim Tapini stesin wantaim ples-balus long namel.



Goilala MP, Mathew Poia i apim na soim nupela 5-Yia Distrik Plen bilong Goilala Distrik

Poia stretim Mona Haiwe i go long Tapini stesin

James Kila i raitim

NAISPELA bus na gutpela klinpela maunten wara i kapsait i kam daun long sait sait long ston na bus. Ol kain kain naispela kala wail flaua i gro na bilasim stret sait bilong rot na na ol wail pisin kamapim naispela singsing bilong welkam long tudak.

Dispela em gutpela kain ekpirisens mi bungim long taim mi ron bihainim Mona Haiwe, em rot i go long wanpela maunten gavman stesin long Tapini insait long Goilala distrik long las wik Fonde.

Mipela i lusim mausrot long Hiritano Haiwe na bihainim karanas rot i go long Kubuna long 2-kilok long apinun na stat long kalapim ol bikpela maunten tru long go kamap long Tapini long samting olsem 8-kilok long nait. Bun bilong mipela i pen nogut tru, na maski sampela long mipela i hangre, mipela i tait stret na pundaun na slip long flua long haus bilong distrik tresera bilong Goilala.

Mi wok long mekim save long kaikai buai na simuk na mi no pilim hangre tumas, tasol sampela ol lain insait long grup bilong mipela i kisim stret.

Yes, mi stori long raun bilong mi long las wik Fonde igo long Tapini stesin insait long Goilala distrik ong Sentral provins.

Tru tumas Goilala distrik em maunten ples tru na long dispela distrik em Tolukuma gol main i stap long en. Ples insait long maunten i nais tru na gutpela kol win we i klin na fres tru i kamaut na bai mekim filings bilong yu i nais tru.

Wanpela wan skul bilong mi long Divain Wod Yunivesiti,

Walis Imbal, husat nau i wok olsem Sentrol provinsal tresera i bin askim mi long go wantaim em long dispela raun igo long Tapini. Mi no bin redi gut na em fes taim tru, na mi ting olsem rot em klostu. Tasol sori tumas, dispela ron long rot em longpela tru na baksait bun na bun long as bilong mi pen nogut tru.

Bihain mipela i abrusim Kubuna na ron i go olsem long Bakoidu na abrusim planti ol raba plentesin long dispela hap. Planti ol raba diwai i gro na namel long ol dispela raba plentesin bai yu lukim ol lokal pipel i katim raba.

Mipela i pilim kol tru taim mipela i ron igo antap long ol maunten. Narapela poroman husat i stap wantaim mi long kar i tokaut olsem tru tumas kol bilong maunten bilong Tapini i wankain tru olsem kol bilong Hailans olsem kol i pilim long ples olsem Kainantu o long Mt Hagen.

Pret i kisim mipela stret bikos ol i ron arere tru long ol maunten. Tru tumas, sapos kar i pundaun i go daun ating nogat wanpela man bai stap laip.

Mi yet mi raun long planti ol rot insait long kantri we rot i poret tru taim yu ron long en. Mi raun long Gumine rot na Gembogl long Simbu. Tasol mi ken tokaut stret olsem dispela rot bilong Tapini bai mekim lewa bilong yu kalap stret na bai yu pret tru sapos yu lukluk i daun long sait bilong ol bikpela maunten.

Mipela i ron long kar yet igo na kamap long wanpela bris i stap daunbilong long maunten long ples we ol i kolim Utamala. Dispela boda kem em kontraksin kampani we i wok long rot i yusim olsem bes bilong ol na ol i save kisim fiul na ol greda

na buldosa na ol trak bilong ol i save stap sambai long mekim wok long Mona Haiwe.

Stori bilong Mona Haiwe Memba bilong Goilala Mathew Poia i bin mekim gutpela wok tru long putim mani long stretim na fiksिम Mona Haiwe long lukim ol gavman sevis na ol narapela moa i go insait long Tapini na Goilala distrik.

Dispela rot ol i kolim Mona Haiwe em olupela Memba bilong Goilala, Louise Mona i bin kamapim long taim em i stap olsem Difens minista. Yes, mipela ken tok olsem rot ya igo long Tapini em hanmak bilong olupela memba Louise Mona, tasol gutpela memba tude, Mathew Poia i stretim na opim gen rot ya long bringim gutpela sevis long sait long trenspot igo long ol pipel bilong em long Goilala.

Mi bin lakim tru long stori wantaim LLG presiden bilong Giruai husat i tokim mi olsem Mista Mona i bin yusim ol lain Enjiniaring Batalion bilong PNG Difens Fos long putim dainamait long sait sait bilong ol bikpela maunten.

Long las wik Fraide yet MP Poia i tokaut long seremoni we em wantaim LLG presiden bilong Giruai, Waitape na Tapini long 5-Yia Distrik Developmen Plen bilong Goilala.

Long dispela taim tu Mista Poia i tokaut olsem em bai givim K690,000 i go long wokim nupela maket long Tapini stesin.

Mista Poiya i tokaut tu long helpim raba prodaksin wantaim K30,000.



Sentrol provinsal tresera, Walis Imbal wantaim ol poroman i amamas long dring naispela maunten wara long rot long Mona Haiwe.



Ol sif bilong Waitape i singsing tumbuna na welkam long Minista bilong Jastis na Atoni Jenerol, Ano Pala, Goilala MP, Mathew Poiya na Galp Gavana, Pitom Bombom long Tapini stesin. Ol poto: James Kila

Moa stori long pes 17



Maunten long piksa i soim hap sait long Fane na hap maunten we Tolukuma gol main i stap long en.



Wantok Niuspepa ripota James Kila i sanap antap long maunten na lukluk igo daun long Tapini stesin.

Poia stretim Mona haiwe i go long Tapini stesin

I kam long pes 16

Long strongim rot projek em i kamapim, Mista Poia i putim K1.2 milien igo long stretim rot na putim karanas long Arapokina na rot i go olsem long Tapini. Dispela mani bai helpim long greida i stretim rot na kliarim rot na tu long rausim ol gras long sait sait bilong rot.

Mista Poiya i tokaut tu nupela trakta em i baim we ol lokal pipel long Tapini na ol viles bai i ken yusim long wok agrikalsa long ples bilong ol.

Dispela seremoni long Tapini stesin i lukim Minista bilong Jastis na Atoni Jeneral, Ano Pala i go. Em i bin flai long helikopta igo pundaun long Tapini stesin na i stap insait long dispela seremoni we Mista Poia wantaim ol LLG presiden na Goilala distrik edministreta i lonsim nupela Goilala 5-Yia Distrik Developmen Plen.

Insait long dispela seremoni tu i lukim Mista Poia i tokaut long K100,000 long baim nupela kar long helpim distrik treseri long Goilala.

Tapini i stap insait long wanpela bikpela dis o sospen

Bihain long yu ron longpela rot tru i go igo na long antap tru bilong maunten bai yu lukluk igo daun long Tapini stesin.

Ol maunten i raunsim dispela stesin na stesin ya i stap daunbilowantaim ol haus na ples-balus i karamapim longpela hap liklik.

Ol maunten we i raunim dispela stesin em Koriaveve, Ivani 1 na 2, Tatupit na Potoro.

Ol pipel bilong Tapini em ol lain bilong bel-isi na planti bilong ol i save lotu long Katolik olsem na long Tapini stesin bai yu ken lukim naispela haus-lotu bilong Katolik misin i sindaun antap long maunten.

Tapini em distrik edministresin senta bilong Goilala distrik na i lukautim 3-pela LLG bilong Goilala. Ol dispela 3-pela LLG em Guari, Tapini na Woitape.

Dispela tripela LLG i makim tripela bikpela tokples insait long Goilala distrik. Ol dispela tok-ples em Kunimaipa (Guari), Tawade (Tapini) na Fuiga (Woitape).

Ol haus bilong ol publik sevans long Tapini i luk nais tru na tu haiskul na praimer skul long Tapini em gutpela tru na i winim sampela ol dispela i stap long taun na siti long PNG.

Yes, dispela raun bilong mi i go long Tapini em gutpela tru na em wanpela ekspiriens mi bai ino inap lusim tingting longpela taim.



Dispela rot konstraksin kem i stap Utamala long bikpela bus tru namel long Mona Haiwe.



Haus maket long Tapini stesin we MP Poia i givim K690,000 pinis long wokim nupela maket. *Ol foto: James Kila*

Program bilong Wanwan De



Mande - Fraide

6am - 10am - Sankamap show - Host: KAS.T
6:15am - Komuniti Notis Bod
6:30am - Nius Hetlains / Bondei grittings
Trukai Rais - GES FAIA KOMPETISEN
6:45am - Niuspepa Hetlains
7:00am - Major Nius Bulletin - YUMIFM Nius Senta
7:15am - Toktok sapotim LO na JASTIS Sekta
7:30am - Trukai Rais - GES FAIA KOMPETISEN
8:00am - Major Nius Bulletin - YUMIFM Nius Senta
8:15am - Stori b'long Skelim Tingting
8:30am - Trukai Rais - GES FAIA KOMPETISEN
9:00am - Nius Bulletin - YUMIFM Nius Senta
9:15am - Luksave long Komuniti (Redio Pilai)
9:30am - Trukai Rais - GES FAIA KOMPETISEN

9:45am - YUMI PAINIM WOK Segment
10:00am - Nius - YUMIFM Nius Senta
10am - 2pm - Monin Trek na Belo Pack - Host: VAVIESSIE
10:10am - Lukatim yu yet - Helt toktok - RH Hyper Mart
10:45am - YUMI PAINIM WOK Segment
11:00am - Nius - YUMIFM Nius Senta
11:10am - Conf'd - Lukauti yu yet - Helt toktok
11:30am - Nius Hetlains b'long Belo Taim
12:00pm - Major Nius Bulletin - YUMIFM Nius Senta
12:10pm - BELO Taim - wantaim sapot b'long TELIKOM
12:15pm - Komuniti Notis Bod
12:20pm - BELO Taim - wantaim sapot b'long TELIKOM
1:00pm - Nius - YUMIFM Nius Senta
1:10pm - BELO Taim - wantaim sapot b'long TELIKOM
2:00pm - Major Nius Bulletin - YUMIFM Nius Senta
2pm - 6pm - Avinun Draiv Taim - Host: Enjo Dabix
2:00pm - 4:00pm (Tunde/ Fonde) TOKAUT TOKSTRET
2:45pm - YUMI PAINIM WOK Segment
3:00pm - Nius - YUMIFM Nius Senta

3:10pm - Avinun cruz
4:00pm - Nius - YUMIFM Senta
4:10pm - "FOAPELA KAM GUD LONG 4"
4:30pm - Nius Hetlains
4:45pm - YUMI PANIM WOK Segment
5:00pm - MAJOR NIUS BULLETIN - YUMIFM Nius Senta
5:10pm - 6:00pm - FLAME KULCHA (1 hr) listeners request
6:00pm - MAJOR NIUS BULLETIN - YUMIFM NIUS Senta
6 - 7pm - Maggi noodles request aua
6pm - 00am - NAIT BEAT - Host: ANGRA KENNEDY
6:10pm - 7:00pm Mun kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
9:00pm - 00am - Nait Beat - Isi Cruz long nait
00am - 6am - BRUKIM TULAIT SHOW - Host: Papa Raegs / Sally / Nenge
00:00 - Early Monin Taim Cruz (ol lain brukim tulait shift)
- Miusik / Request / Tok pilai
- Kipim Kampani long ol nait shift.

Weekend Shift - Saturday & Sunday
6:00am - 11:00am - Wilken Sanrais
6:30am - Komuniti Notis Bod - Bondei grittings
7am - 9am - Wilken Spots
9am - 11am - Monin Raun
11am - 1pm - National Weekly Hit Parade (Host Kas.T)
2pm - 6pm - Sarere Avinun Draiv
6pm - 00am - Nait Beat (Host Angra Kennedy)

YUMIFM POROMAN TEAM:
Tumer (KAS.T) Arifeae - Team Leader / Program Director
Angra KENNEDY - Senior Announcer
Sinimil (Vaviessie) Philipo - Promotions Co ordinator
Papa Raegs - Announcer Nenge Neings - Announcer
Enjo Dabix - Announcer Selestine Sally Sino - Announcer

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Nius na Karen Afecas
8.15PM Musik
8.30PM NUIS
8.40PM Spots Riplei
8.55PM Musik
9PM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Mama Graun
8.15PM Musik/Spots
8.30PM NUIS
8.40PM Helt Riplei
8.55PM Musik
9PM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Focus
8.15PM Musik/Spots
8.30PM NUIS
8.40PM Mama Graun Riplei
8.55PM Musik
9PM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Youth
8.15PM Musik/Spots
8.30PM NUIS
8.40PM Focus Riplei
8.55PM Musik
9PM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Wantok
8.15PM Musik
8.30PM NUIS
8.40PM Youth Riplei
8.55PM Musik
9PM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Wantok
8PM Lokal Ben
8.30PM Nius
8.40PM Musik/Chit Chat
9PM Stesen Pas

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Femili Blong Serah (Redio Plei)
8PM Lukluk Bek Long Wik
8.30PM Nius
8.40PM Musik/Chit Chat
9PM Stesen Pas

Raun wantaim Wantok kru...



PAINIM PLES LONG SILIP. Pusi hia painim ples bilong silip na go insait long kamera beg bilong Nicky Bernard.



SOIM STRET: Hia ol meri pilaia bilong Orijinol Cool graphix i redi long pilai snuka.

93FM YUMIFM National Weekly Hit Parade:
Sponsor: Digical - Diggers, better network
Produced & Host by: Kas.T
Satellites: Talaga Sophie & Poroman Crew
Week Ending: Saturday - 24th July 2010
Table with columns: Week, Last, This, Charting Song, Artist.



BIK BOIS: Dominic Krau, Fada Sus Laumaea (wait mausgras lapun pinis), raitman Michael Malabag, John Paska na pilaia bilong Tamabaran Team wantaim Eric Kone i soim tru we bilong rileks na malolo long Lamana Gold Club long las wik Sarere.



MANGI MADANG KAM RAUN: Liklik Brenden Natera i kam raun long Mosbi wantaim bubu meri bilong em long lukim papa bilong em. Hia em na papa bilong em William Natera raun long Renbo viles i stap. Long baksat em fada dok bilong Renbo, Midnait Choi.

Ol Poto Nicky Bernard

EMTV Television Guide

Table with columns for date (FONDE, FRAIDE, SARERE, SANDE, MANDE) and time slots (7.30PM, 8.30PM, 9.00PM, 9.30PM, 11.00PM, 11.30PM, 12.00PM, 12.30PM, 1.30PM, 2.00PM, 4.00PM, 4.30PM, 4.57PM, 5.00PM, 5.29PM, 5.30PM, 6.00PM, 6.30PM, 7.00PM, 7.27PM, 7.30PM, 9.30PM, 11.30PM, 12.00PM, 12.30PM, 1.30PM, 2.00PM, 4.00PM, 4.30PM, 6.29AM, 6.30AM, 7.00AM, 7.30AM, 10.00AM, 11.00AM, 11.30PM, 12.00AM, 1.00PM) listing various programs like STATION OPEN, JOYCE MEYER, NATIONAL EMTV NEWS, SUPER LEAGUE, etc.

Raun wantaim Kanage olgeta wik

Tok pisin i krangi

KANAGE wantaim ol famili i go long gaden na ol i wok i go na avinun nau. Em nau Kanage i tokim ol famili, yupela digim ol taro kong kong na bai mi go kuk. Em nau bai yupela testim stail kuk bilong mi.

Kanage na ol pikinini sapim taro pinis na kukim long pot. Kaikai kuk pinis na Kanage i memeim olgeta taro insait long pot wantaim stik. Taim wok i pinis na em i redi, Kanage i stat long sutim kaikai bilong mama wantaim ol pikinini, ol kaikai pinis na liklik susa bilong misis i kam kamap na Kanage lukim em na tok, tambu sori tru mi kukim taro na mi sutim bilong mama, mi sutim bilong yangpela pikinini meri na las bilong junia. Sapos yu kam pastaim liklik ating bai mi sutim bilong yu tu. Tambu meri harim tok pisin i no kam gut na em tokim kanage laki bilong mi na mi kam leit, nogat bai yu sutim mi laip wan stret. Mama harim tok pisin i no kam



gut, em tokim liklik bilong em, nau yu silip na tumoro tasol yu tek ov.

**Wally Anis
Mt Hagen, WHP**

Rins wantaim rais

KANAGE bilong ples Arowe long Wes Nu briten. Kanage i stap long ples i go na em i les pinis long kaikai gaden kaikai. Em i laik kaikai rais stret na ting ting bilong em i strong olsem em i mas go long taun na lukim brata bilong em. Brata bilong em i save wok wantaim forestri long Dami. Kanage i go kamap nau long taun na kisim ruts 3 go kamap long Dami. Brata blong Kanage i kirap nogut long em i kamap long haus. Pes taim bilong em long kam long Kimbe taun tu yah! Brata bilong em i askim em, Kanage, wanem

wari bilong yu stret na yu kam a? Kanage i no westim taim. Em i tokim brata bilong em olsem, mi laik rins liklik olsem na mi kam. Em i no tok stret olsem em i laik kaikai rais olsem na brata bilong em i paul nogut tru na askim em wanem samting em rins? Kanage i tokim brata olsem mi stap long ples na mi tait long kaikai bilong gaden olsem na mi laik kam rins liklik long rais. Brata bilong em i lap long em na em i sem nogut tru na tok brats, nupela tok pisin bilong mipela ol mangi Arowe na noken paul, paul i no kam yet.

**Mice Hunter, Original West
Kimbe WNP**

Ol skwat!
Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email:
atolire@wantok.com.pg



NEM: Emmanuel Tifa
KRISMAS: 17 (man)
ADRES: Bema High School, Private Mail Bag, Lae, Morobe province
SAVE LAIKIM: Harim musik, pilai soka, stori, go lotu na ritim buk.

NEM: Andrew Banakato
KRISMAS: 17 (Man)
ADRES: Bema High School, Private Mail Bag, Lae, Morobe province
SAVE LAIKIM: Pilai ragbi, stori, mekim pani, ritim buk, raitim pas, pilai gita, harim musik na go lotu.

NEM: John Jons
KRISMAS: 18 (man)
ADRES: Bema High School, Private Mail Bag, Lae, Morobe province
SAVE LAIKIM: Pilai musik, soka, volibol, serim ol samting, go lotu na pilai spot.

NEM: Thomas Kuni
KRISMAS: 18 (man)
ADRES: Bema High School, Private Mail Bag, Lae, Morobe province
SAVE LAIKIM: Pilai spot, pilai musik, harim musik na go lotu

NEM: Peter Moran
KRISMAS: 24 (man)
ADRES: P.O Box 541, Kimbe, West New Britain Province.
SAVE LAIKIM: Pilai soka, volibol, na basketbol, lukim TV, danis na wokim gaden, ritim buk na mekim pani

NEM: Irami Peter
KRISMAS: 19 (Man)
ADRES: Mora Mora Technical School, PO Box 23, Hoskins, West New Britain Province.
SAVE LAIKIM: Pilai spot, raitim pas, mekim pren na harim musik

NEM: Kate Peter
KRISMAS: 20 (meri)
ADRES: Mora Mora Technical School, PO Box 23, Hoskins, West New Britain Province.
SAVE LAIKIM: Harim musik, pilai gita, mekim pani na raitim pas na go lotu

NEM: Rita Ande
KRISMAS: 19 (meri)
ADRES: Integrated School, P.O Box 907, Kimbe, West New Britain Province.
SAVE LAIKIM: Kukim kaikai, pilai spot, harim musik, raitim pas, mekim pren, na go skol

NEM: Lowi Imias
KRISMAS: 22 (man)
ADRES: C/- P.O Box 96, Wau, Morobe Province
SAVE LAIKIM: Mekim pren, mekim pani, stori na raitim pas

NEM: George Luguni
KRISMAS: 22 (man)
ADRES: P.O Box 33, Mendi, Southern Highlands Province
SAVE LAIKIM: Pilai ragbi, basketbol, soka na voli-bol, stori, pilai gita na go lotu

Boipren i bikhet long mi

Dia Laiplain

Mi wanpela sumatin meri i gat 19 krismas na wokim Gret 12 long Sekonderi skol. Mi gat boipren pinis we mitupela i bin bung taim mipela i wokim Gret 3. Bikos long skol, mi nau stap long narapela provins.

Taim mi skol i stap long narapela provins, kasen susa bilong mi i tokim mi olsem em i raun wantaim boipren bilong mi. Mi wari na sori nogut tru taim mi harim dispela nius. Taim mi go long Krismas malolo, mi askim boipren na em i tok duspela nius em i tru. Taim em i toktok, em i lukluk stret long ai bilong mi na em i tok mi olsem mi namba wan lewa bilong em stret na oltaim bai mi stap olsem gel bilong em.

Long mi tu, em i namba wan boipren mi gat na em tu i bin katim lewa bilong mi. Na mitupela i bin promis olsem bai mitupela i marit taim mipela i pinisim skol. Kasen bilon mi i tokim mi long lusim em tasol mi painim hat long lusim tingting long em, maski em bin tok em bin raun wantaim kasen susa bilong mi.

Plis helpim mi.

Undecided Lover

Dia Pren

Tenkyu long serim wari bilong yu wantaim mipela. Mipela i sori long ritim stori bilong yu na mipela i luksave long no amamas bilong yu wantaim longpela taim boipren bilong yu.

Pren, mipela i save kisim ol wankain pas long planti meri wantaim dispela kain wari. Mipela i luksave olsem bikos yutupela i poroman longpela taim, em i no isi long luksave olsem em i wok



long lukim narapela meri. Na i no narapela meri tasol kasen susa bilong yu.

Yu wok long painim hat long lusim em bikos olsem yu tok, em i namba wan boipren bilong yu. Na yutupela i bin tok promis long marit bihain long yutupela i pinisim skol. Yu pilim olsem wanem nau long dispela promis bihain long man i wokim bikhet pasin long yu. Hau bai yu save olsem em bai em ino inap mekim obikhet pasin gen? Lukim yu long ai na tokim yu olsem yu namba wan lewai mas noken mekim yu bilip olsem em i gat bikpela laik na long wankain taim, em i no stretim asua bilong em. Bai yu trastim em yet gen?

Yu tok tu olsem em i namba wan boipren yu laikim tumas na em i namba wan lewa bilong yu. Yu ting em i wokim trupela toktok taim em i tok em i gat laik long yu tasol lukim narapela husat i kasen bilong yu?

Pren, yu klia long wanem em trupela lav o laik pasin? Lav em maski wanem samting, yu mas pas wantaim na mekim gut long narapela husat yu pren wantaim. Lav i min olsem yu no tingim yu yet bikos yu tingim patna bilong yu moa yet long yu yet. Hia em tupela wod yu mas sekim na save long mining bilong ol. Em long "Lust" na "Infatuation".

Ol papamama bilong yu i olsem wanem, ol i tok orait long yu i gat boipren? Mipela i laikim yu mas tingting strong long skol bilong yu. Ating dispela i kamap long mekim yu tingt-

ing long prensip bilong yu wantaim manki ya. i moabeta yu lusim em na yu wok strong long stadi bilong yu. Sapos em i laikim yu tru, em i ken helpim yu wet inap yu pinisim skol, painim wok na bihain long dispela, plenim marit bilong yutupela.

Yu luksave olsem taim yu gat boipren yu givim yu yet moa wok antap long ol stadi bilong yu? Ol taim we yu inap long yusim long mekim stadi bilong yu gut em yu yusim long tingim na mekim ol samting i sut long boipren bilong yu. Tru tru, yu nogat wanpela samting i pasim yu wantaim dispela manki, tasol bikos yupela i bin mekim promis, yu wok long yusim taim na spes bilong yu long tingim em.

Mipela i strongim yu long serim ol wari yu gat wantaim ol narapela gutpela pren o papamama na ol i ken helpim yu. Sapos yu memba bilong wanpela sios o lotu, i moabeta yu go lukim Pasto long givim yu sampela gutpela stiatok.

Mi Pren bilong yu
Laiplain

Sapos yu gat wari o hevi, rait i kam long dispela etres: Lifeline Counselling Services, P O box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.

Laiplain

Fama askim long kamapim kopi benk

Soldier Buruka (DAL) i raitim

WANPELA kopi fama long hailans i askim gavman long kamapim benk we i ken givim mani long kopi industri.

Dispela em long wanem kopi i bikpela maket we kantri i save salim na kisim mani long em.

Na em i samting we planti ol rurel manmeri i mekim bisnis long em, Francis Warigiso bilong Isten Hailans i tok.

Mista Warigiso, wanpela long-taim kopi fama i tok Kopi Industri Koporesen (CIC) na ol arapela gavman ejensi we wok bilong ol i pas long wok bilong kopi i no moa givim sapot long ol fama olsem ol i mas mekim long em.

Dispela i mekim namba bilong salim kopi i go aut long kantri i kamdaun.

"Kopi industri i mekim planti mani bilong kantri tasol mani i kam i go we?"

"Mi bilip sapos mani i stap long sampela hap we gavman i save long em em i mas yusim dispela mani long kamapim nupela benk.

I gat ol pablik mani we gavman i mas yusim long strongim wok bilong kopi industri long sapotim ol manmeri bilong bihain taim," Warigiso i tok.

Warigiso husat i bipo politik man i lusim politik na strongim kamap bilong ol Namauka na

Lupae kopi bisnis developmen grup i tok em i bikpela samting gavman i mas givim sapot bilong em nau.

Sapos em i wet sampela taim bihain gen dispela bai lukim pundaun bilong industri.

"Planti kopi fama, produsa, baia na stekhold i no amamas long sevis em CIC na ol arapela gavman ejensi i mekim long dispela taim."

Em i tok CIC i givim laisens bilong ekspotim kopi i go long ol lain husat i no nogat save long developim na strongim industri.

Levi em ol ekspota i kisim long salim kopi i go aut i mas go bek long ol fama long strongim tingting bilong ol long skruim dispela wok.

Long Fimito ples ausait long Goroka, wanpela gutpela fama, husat i groim rais tu i tok mani we CIC i kisim long kopi em i mas yusim long helpim ol lokol fama gen.

Moa mani ol i mas givim long kamapim ol kopi neseri long wanwan ol distri.

Warigiso i tok planti ol Papua Niugini manmeri husat i papa bilong ol kopi grup i mekim wok gut long bisnis bilong ol.

Dispela ol grup i laikim sapot long gavman long bungim sas i kamap long guds na sevises.



LAIKIM HELPIM: Warigiso (rait han) wantaim DAL Hailans Rijnel Opisa edministresen opisa John Kawage

BSP Goroka helpim long lukautim taun



STAP KLIN: BSP Goroka Branch setting the drums up.

BIHAINIM tingting bilong Taun Kaunsil long lukim Goroka taun i stap klin BSP Goroka long las wik i stretim na sanapim 24 rabis bin long taun long larim ol manmeri i tromoi pipia i go insait.

Benk i helpim long weldim na sanapim ol ain we bai mekim isi long ol manmeri i tromoi pipia.

BSP Goroka menesa Maria Kipau i tok dispela projek i kamap long taim stret we

taun atoriti i kamap wantaim plen bilong lukautim taun i stap klin.

"Ol i wok long askim provinsel gavman long painim mani long taim mipela kamap na givim helpim long ol," Mis Kipau i tok.

Em i tok ol i sanapim ol bin long olgeta hap bilong taun i go long Haussik na Wes Goroka.

Goroka Deputi Taun Menesa Harold Abori na

Deputi Edministreta Solomon Tato long taim bilong hen-ova tek-ova seremoni i tok tenk yu long tingting na helpim bilong benk.

Kain wok em benk i mekim long olgeta brens bilong em long kantri.

Inap long dispela taim Benk i pinisim 6-pela projek long Boroko, Madang, Kundawa, Aitape na Wewak brens.

Stretim rot sistem long hailans rijen

Soldier Buruka (DAL) i raitim

HEVI bilong sosel we i pas long lo na oda na kompensesen em ol bikpela samting we i pasim laik bilong stretim ol rot long kantri.

Ol provinsel wok menesa long 5-pela hailans provins i tokim CIMC woksop we i bin kamap long Goroka i no longtaim i go pinis olsem hevi bilong lo na oda na toktok bilong kompensesen i pasim kamap bilong gutpela rot.

Wantaim sot bilong kamapim gutpela rot, sik HIV AIDS tu i kamap bikpela.

Ol arapela hevi em sot bilong save em ol kontrekta i gat long em long mekim gutpela rot.

Dispela multi-bilion LNG projek i as bilong sas em ol kontrekta i mekim long gavman i haiarim ol.

Ol hetman i tok planti ol nesanel na provinsel

rot i bagarap na i laikim gavman long stretim.

Kamap na stap bilong gutpela rot bai lukim kamap bilong ol arapela guds na sevis bilong gavman i go long ol manmeri.

Moa yet long ol manmeri i go long ol maket na go insait long mekim ol wok bisnis.

Ol i tok gavman i mas katim inap mani long mani plen long strongim rot netwok long kantri.

Na wantaim sapot long nesanel gavman em sapot i kam long ol provinsel gavman, bisnis haus na komyuniti grup.

Ol politisen long nesanel, provinsel na lokol level i mas mekim wok bung na mekim wok bilong ol stret long strongim ol rot long kantri.

Ol i tok gavman i mas givim inap mani long Dipatmen bilong Woks bai em i ken mekim gut ol wok bi-

long em.

Gavman i mas givim gutpela sapot long Plent na Trensot Brens bilong Woks na Trens bai ol i gat olgeta masin ol i mas gat long mekim wok.

Wantaim dispela ol i tok gavman i mas lukim olsem pe na stap bilong ol profesinsel opisa olsem ol enjinia na ol seveia i mas gutpela long lukim ol i stap yet wantaim gavman.

Sapos nogat dispela bai lukim ol bai lusim gavman na go long praiwet sekta na painim wok.

Ol i askim gavman long em i mas hariap kamapim dispela lo we i ken pasim ol papa-graun long ol i no ken askim tumas long kompensesen long graun bilong ol taim gavman i mekim rot.

Ol i tok kamap bilong dispela lo bai lukim kamap bilong ol gutpela rot long rijen.



NUPELA TRAKTA: Ol hetman bilong Woitape singsing tumbuna na welkam long nupela trakta long Tapini las wik Fraide. Poto: James Kila

MP Poia givim nupela trakta long wok agrikalsa long Goilala

James Kila i raitim

MEMBA bilong Goilala, Mathew Poia, long las wik Fraide i givim wanpela nupela trakta i go long ol pipel long ilektoret bilong em long sapatim wok agrikalsa.

Insait long wanpela seremoni long Tapini gavman stesin Mista Poia i tokaut olsem em i bikpela driman bilong em long lukim olsem ol pipel bilong em long Goilala distrik i yusim save na risos bilong ol long bringim developmen long ples na tu long helpim sindaun bilong ol long ples na hauslain.

MP Poia i askim ol ovasis dona ejensi long helpim ol pipel bilong rurel Goilala distrik long sampela nupela kain invesmen na developmen long helpim ol pipel.

Mista Poia i tokaut long ol pipel long Tapini stesin olsem dispela trakta bai helpim ol manmeri long ples long wokim gaden na kamapim gutpela kaikai long sapatim sindaun bilong famili long haus na ples.

Em i tokaut olsem dispela nupela trakta em wanpela man em i makim nem bilong em Tumai bai lukautim long givim helpim i go long ol rurel famas long Tapini eria na ol narapela ples klostu

Long las wik Fraide yet MP Poia i tokaut long seremoni we em wantaim LLG presiden bilong Giruai, Woitape na Tapini long 5-Yia Distrik Developmen Plen bilong Goilala.

Long dispela taim tu Mista Poia i tokaut olsem em bai givim K690,000 i go long wokim nupela maket long Tapini stesin.

Mista Poiya i tokaut tu long helpim raba prodaksin wantaim K30,000.

Long strongim rot projek em i kamapim, Mista Poia i putim K1.2 milien igo long stretim rot na putim karanas long Arapokina na rot i go olsem long Tapini. Dispela mani bai helpim long greida i stretim rot na kliarim rot na tu long rausim ol gras long sait sait bilong rot.

Dispela seremoni long Tapini stesin i lukim Minista bilong Jastis na Atoni Jeneral, Ano Pala i go. Em i bin flai long helikopta igo pundaun long Tapini stesin na i stap insait long dispela seremoni we Mista Poia wantaim ol LLG presiden na Goilala distrik edministreta i lonsim nupela Goilala 5-Yia Distrik Developmen Plen.

Planti ol manmeri bilong Mosbi siti husat i ron samting olsem 5-pela aua olgeta stat long mausrot long Hiritano Haiwe bihainim maunten igo long Tapini i luksave stret olsem Goilala i gat gutpela graun long groim kain kain ol gaden kaikai we i save gro gut long kol ples olsem long Hailans long PNG.

Ol i opim ai stret long lukim olsem ol raun-kapis, kerot, onion na ol narapela kumu olsem kru-sako i go gut tru long dispela ples. i gat tu ol frut olsem suga frut, avocado na ol narapela samting olsem karuka i go gut tru long dispela ples.

Bikpela hevi long sait long bringim ol dispela fres gaden kaikai igo long Mosbi siti em trenspot. Tasol nau MP Poia i putim mani long stretim rot bai helpim ol dispela pipel bilong maunten ples insait long Sentral provins.



Em Isi tru long Kisim Fres Prodius Maket Infomesin wantaim ol Digicel Fon

Fres Kaikain	Kod	Yunit
Avokado	AVO	kg
Snek Bin/Frens POM	BEAN	k
Brokoli	BROC	kg
Kabis	CAB	kg
Kerot	CAR	kg
Galik	GAR	Kg
Onion	ONN	Kg
Orens	ORA	Kg
Painapol	PINE	kg
Poteto	POT	kg
Swit Poteto (kaukau)	SPOT	kg

Ol famas na lain bilong baim fres kaikai bai isi tru nau long kisim maket infomesin long ol fres kaikai taim ol i yusim wanpela Digicel mobail fon. Bihainim ol dispela isi rot tasol:

1. Presim na raitim kod bilong fres kaikai na larim wanpela spes i stap
2. Presim na raitim daun variabel (prais, saplai o kwaliti)
3. Presim SEND igo long 4636
4. Wanpela text mesej i soim wanem maket infomesin yu laikim bilong ol 8-pela bikpela maket long PNG

Variable
Prais
Saplai
Kwaliti



Digicel
PNG's Biggest, Better Network



Mekim gutpela Prodaksin na Maket Disisen long ol frut na fres gaden kaikai bilong yu

Wantaim maket infomesin i stap pinis, em i ken halivim yu long mekim disisen long wanem kaikai bai yu groim long gaden na kisim, hamas long groim, wanem hap long salim, wanem kaikai na ples bai yu baim.

Long kisim moa infomesin, ringim Help Desk long
72652747/72784968/73050007/3215520/72459749

Wanpela Gutpela wok helpim em Fres Prodius Developmen Ejensi, Digicel na AusAID i bringim kamap.

KALAP: Wanpela pilaia bilong Kawaso i salim bal i go long sait bilong ol Vailima long NCD divisen wan volibol salens las wik Sarere. *POTO: Andrew Molen.*

KISIM EIM: Wanpela pilaia bilong KOOL Graphics Tim i kisim eim. *POTO: Nicky Bernard*

RUSIM: Vipers huka, Toua Kohu i rausim Johnson Kuike bilong Rangers long bemobile kap gem bilong ol long Mosbi las wik Sande. *POTO: Nicky Bernard.*

RESIS: John Rivan (rait han) i klostu long abrusim narapela rana long nesanel sempionsip long Lae tupela wik i go pinis. *POTO: PNGAU.*

Port Moresby Rugby Football Union
Wik 16 dro
Sarere 24th Julai, 2010

Pilai graun 1

9:00am	20	Kone	vs.	Royals
10:20am	B	Kone	vs.	Royals
11:40am	B	Brothers	vs.	Chiefs
1:00pm	A	Brothers	vs.	Chiefs
2:20pm	A	Kone	vs.	Royals
3:50pm	Primia	Kone	vs.	Royals

Pilai graun 2

9:00am	U20	Brothers	vs.	Chiefs
10:20am	U20	Lasalians	vs.	Hunters
11:40am	B	Lasalians	vs.	Hunters
12:50pm	Meri	Defence	vs.	Royals
2:20pm	A	Lasalians	vs.	Hunters
3:50pm	Primia	Lasalians	vs.	Hunters

Sande 25th Julai, 2010

Pilai graun 1

9:00am	U20	University	vs.	Defence
10:20pm	B	University	vs.	Defence
11:40pm	Meri	Lasalians	vs.	Harlequins

12:50pm	A	University	vs.	Defence
2:20pm	Primia	Brothers	vs.	Chiefs
3:50pm	Primia	University	vs.	Defence

Pilai graun 2

10:00am	U20	Wanderers	vs.	Harlequins
11:20pm	B	Wanderers	vs.	Harlequins
12:40pm	Meri	Wanderers	vs.	Sisters
1:50pm	A	Wanderers	vs.	Harlequins
3:20pm	Primia	Wanderers	vs.	Harlequins

Corporate Touch Port Moresby
Raun 15
Sande 25th Julai, 2010.

Pilai graun 1 - Pul A

8:30am	OM	BSP Love your Bank	vs	Nuiford Water Board
9:00am	OM	Bishop Brothers	vs	Colgate Palmolive
9:30am	OW	BSP Love your Bank	vs	Nuiford Water Board
10:00am	OW	Bishop Brothers	vs	Colgate Palmolive
10:30am	MIX	BSP Love your Bank	vs	Nuiford Water Board
11:00am	MIX	Bishop Brothers	vs	Colgate Palmolive
11:30am	JN MIX	White	vs	Blues
12:00pm	MAS	BSP Love your Bank	vs	MTSL
12:30pm	MAS	NCD Professional	vs	Coffee International
1:00pm	OW	SP Brewery	vs	Crusadors

1:30pm	OW	David Consultant	vs	G4S
2:00pm	MIX	SP Brewery	vs	Crusadors
2:30pm	MIX	David Consultant	vs	G4S
3:00pm	OM	SP Brewery	vs	Crusadors
3:30pm	OM	David Consultant	vs	G4S
4:00pm	OMIX	Train on Squad	vs	Train on Squad

Bai: (Open) Coffee International, (Masters) G4S.

Pilai graun 2 - Pul B.

8:30am	OM	POST PNG	vs	NCD Professional
9:00am	OM	Origin Energy	vs	PNG Power
9:30am	OM	Propest International	vs	PNG Sustainable
10:00am	OW	POST PNG	vs	NCD Professional
10:30am	OW	Origin Energy	vs	PNG Power
11:00am	OW	Propest International	vs	PNG Sustainable
11:30am	MIX	POST PNG	vs	NCD Professional
12:00pm	MIX	Origin Energy	vs	PNG Power
12:30pm	MIX	Propest International	vs	PNG Sustainable
1:00pm	OW	MTSL	vs	GUINNESS
1:30pm	OW	SPAC	vs	PWC
2:00pm	MIX	MTSL	vs	GUINNESS
2:30pm	MIX	SPAC	vs	PWC
3:00pm	OM	MTSL	vs	GUINNESS
3:30pm	OM	SPAC	vs	PWC

TOKSAVE: Salim ol spots dro bilong yu kam long Feks; 325 2579, e-mel: amolen@wantok.com.pg o kam lusim long Wantok Niuspepa opis long Central Waigani, NCD.

Ragbi yunion nap long kisim Inglis

RAGBI yunion bai amamas tasol long kisim Greg Inglis sapos em i tingting long lusim ragbi lig bipo long ragbi wol kap long Nu Silan (New Zealand).

Australian Rugby Union (ARU) i no tokaut klia long dispela tasol i gat bilip olsem ol bai amamas long kisim Inglis sapos em i laik go.

Inglis i bin askim Melbourne Kosa, Craig Bellamy sapos ol i ken lusim em i go bek long Brisbane wantaim meri bilong em Sally Robinson.


Tasol ol Broncos i no bin

inap long baim em long pilai wantaim ol.

Ol Broncos i no inap long abrusim mak bilong \$400, 000 long baim Inglis husat ol Storm i save baim em long \$600, 000 long wanpela yia.

Tasol sapos em i go pilai wantaim ragbi yunion tim bilong Brisbane, Queensland Reds, em bai ol inap baim em wankain mani olsem long Melbourne.

Em i gat bikpela bodi na gutpela spit na bai pilai gut long ragbi tasol nau yet Inglis i stap yet long maket.



Greg Inglis

Elias laikim Bennett kosim Blues

BIPO NSW Blues huka, Benny Elias, i laik ol i kisim bipo Queensland kosa, Wayne Bennett long helpim ol winim State Of Origin gen.

Na Elias i laik stap tu olsem asisten kosa bilong Bennett long 2011.

Craig Bellamy bai no inap holim dispela wok moa na i gat bilip olsem planti arapela biknem man bai traim long kisim ples bilong em.

Namel long ol em Phil Gould na Ricky Stuart husat i tok ol i laik helpim ol Blues sapos dispela wok i kamap long ol long yia i kam.

Elias i bilip ol i mas lukluk i go long Queensland na kisim wanpela birua long helpim ol gen.

Long wankain taim, bipo Blues kosa, Steve Mortimer, i singaut long ol i mas senisim olgeta ofisol bilong tim.

Em i tok dispela ol lain i stap long

taim na wok bilong ol i no strong moa na dispela i givim hevi long tim.

Ol Blues i lusim gem 5-pela yia nau na i gat bilip olsem ol Maroons bai win yet long planti moa yia i kam sapos ol Blues i no mekim sampela senis.

"Yumi traim na askim Wayne Bennett - em i bin helpim New Zealand long winim Australia long wol kap," em i tokim ol niusman long Australia.

"Em i save long Origin bilong wanem em i mekim dispela pinis," Elias i tok.

"Rekot bilong Wayne i soim olsem em i nambawan kosa nau na tu em bai mekim gem i hat gen.

"Phil Gould em rait man bilong dispela wok tasol mi no ting em bai nap long mekim," em i tok.



MEKIM SAMTING: Elias i laik kamap asisten kosa bilong Blues long 2011.

Tasol taim dispela askim i go long Bennett em i tok; "Mi bilong Queensland."

Bihain em i tok moa olsem, "I gat tupela samting mi no inap mekim long laip bilong mi, mi no inap kosim ragbi yunion na mi no inap kosim NSW."

Tasol Elias i no les yet na i tok em i laik stap yet long 2011.

Tahu kam bek pilai

TIMANA Tahu i kam bek insait long Parramatta Eels tim bihain long em i pinisim 4-wik saspensen bilong em.

Tahu bai statim gem long senta posisen bilong em taim ol i bungim Canterbury long Fraide nait long raun 20.

NRL i saspenim Tahu long Mande, Jun 11 bihain long em i mekim wanpela takol nogut long Newcastle Knights winga James McManus long raun 15.

Kam bek bilong em long tim bai lukim ol i rausim Jonathan Wright husat i putim trai las wik long helpim ol i winim Penrith 34-28.

Eels kepten, Jason Cayless i save olsem Tahu bai no inap daunim tim.

"Olgeta mangi sapatim Tahu na mi toktok long em tu na em i trening gut olsem na mi save em bai pilai gut tu," Cayless i tok.

Cayless i tok Tahu em wanpela



KAM BEK: Tahu i pinisim saspensen na bai statim gem agensim Bulldogs dispela Fraide.

gutpela pilaia husat i gat spit na pawa long ron na pilai bilong em na i save helpim tim gut tru.

"Mi laik lukim tu gutpela salens namel long em na Jamal Idris gen," Cayless i tok.

Stuart lusim Sharks

RICKY Stuart i lusim Cronulla Sharks bihain long em i lukim olsem ol pilaia i no bilip moa long em.

Em i stap 4-pela sisen long hap long traim na helpim tim tasol bihain long lus bilong ol las wik agensim Manly, em i daunim het olgeta.

"Mi save traim hat tasol long Sarere nait mi sem stret bilong wanem ol i no pilai gut tru," em i tok.

"Mi toktok wantaim ol pilaia bihain long gem na mi lukim olsem mi mas mekim dispela," Stuart i tok. Stuart i lusim klap 6-pela wik bipo long kontrak bilong em i pinis wantaim ol.

Shane Flanagan nau bai kisim ples bilong em.

NRL SPOTS DRO RAUN 20 JULAI 23-26 2010

Gems bilong dispela wik

	Broncos		Roosters
	Bulldogs		Eels
	Cowboys		Knights
	Dragons		Titans
	Rabbitohs		Warriors
	Raiders		Sharks
	Eagles		W/Tigers
	Storm		Panthers

Raun 19 - Poin Leda

TIM	W	L	D	B	Pts
1 Dragons	13	4	0	2	30
2 Panthers	11	6	0	2	26
3 Tigers	11	6	0	2	26
4 Roosters	10	7	0	2	24
5 Warriors	10	7	0	2	24
6 Sea Eagles	9	8	0	2	22
7 Broncos	9	8	0	2	22
8 Titans	9	8	0	2	22
9 Rabbitohs	8	9	0	2	20
10 Eels	8	9	0	2	20
11 Raiders	7	10	0	2	18
12 Knights	7	10	0	2	18
13 Bulldogs	6	11	0	2	16
14 Sharks	5	12	0	2	14
15 Cowboys	4	13	0	2	12
16 Storm *	9	8	0	2	0

* NRL i rausim olgeta poin bilong Melbourne Storm long dispela sisen.

Presiden no amamas long Unitech

PRESIDEN bilong ol sumatin (SRC) long yunivesiti bilong Papua Niugini (UPNG), Rainbo Piari no amamas long ol wok redi na ronim bilong 2010 University gems long Unitech tripela wik i go pinis.

Em i tok dispela em i namba wan taim bilong dispela pilai i kamap aninit long nupela nem olsem PNG

University Games.

Bipo ol i save kolim NUS Games.

"Tasol mipela i lukim olsem i gat long-pela rot i stap yet bilong wanem ol i no bin redi gut tumas," Piari tok.

Em i tok ol i ting nem i senis na ol wok redi tu bai kamap gut moa tasol nogat, em i wankain yet.

"Long sait bilong givim ol awod tu em i nogut olgeta," Piari tok.


Tasol em i tok planti ol tim i wari long win na i no tingting tumas long bung na luk-save long ol yet bilong wanem ol i kam long olgeta hap bilong kantri.

"Mi amamas long ol UPNG sumatin bilong wanem ol i bung gut wantaim ol

pilaia bilong ol arapela yuni," Piari tok.

Em i amamas tu long tim bilong em bilong wanem ol i karim gut nem bilong UPNG na i soim gutpela pilai na piksa bilong skul bilong ol.

"Mipela i go wantaim bikpela bilip long pilai gut bilong wanem mipela i save olsem mipela i redi gut.



NUPELA GEM: Futsal i gat sans long kamap bikpela long PNG.

NGI lainim FUTSAL

28 MANMEREI nau i wok long lainim nupela kain pilai bilong soka long Kimbe.

Dispela pilai em Futsal.

Em i no nupela spot long planti ol arapela kantri tasol em i namba wantaim bilong en nau long kamap long Papua Niugini.

Futsal em i olsem soka tasol ol i save pilai insait long bikpela haus.

Spes bilong pilai tu i liklik moa na i save gat 5-pela pilaia long wanwan tim, wampela bilong ol dispela pilaia em goli.

FIFA instrakta na WIO projek menesa bilong Futsal insait long OFC, Scott Gilligan i go pas long givim trening long dispela 28 lain.

"Mipela i lainim tasol ol as tru bilong pilai gem, hamas pilaia bilong en na pilai graun bilong en," Gilligan i tok.

Em i tok ol bai lainim tu sampela stail bilong pilai dispela gem long sait bilong traim long putim gol na tu long sait bilong pasim narapela tim long skoa.

Gilligan i bilip PNG nap kamap gut long Futsal olsem Solomon Ailan, sapos ol i mekim stret na bihainim gut.

Wampela kos bilong ol refri tu long Futsal i kamap.

Raun tu i stat nau ... Ol tim sanap klosu

■ Ikam long Pes 28

Tasol dispela ol poin i senis bihain long ol namba wan pilai bilong namba tu hap.

Tupela top tim long leda i sek-sek long lukim olsem tupela wantaim i no mekim gut, we tupela i bin lusim tupela pilai bilong ol.

Muruks i bin lus long han bilong Bombers na Gurias i no mekim nais long Goroka taun las wiken.

Muruks i ting olsem dispela pilai long Lae bai isi long ol long wanem, em i bin win long raun wan na ting ol bai mekim wankain gen.

Ol i kirap nogut taim Bombers i stopim ol gut tru.

Tasol dispela lus bilong ol i no mekim wampela senis long posisen bilong ol long poin leda

na wankain long Gurias.

Tupela i holim strong yet long namba wan na tu ples.

Tasol lus bilong Gurias i helpim Lahanis long kisim tupela poin na i go insait long top 5.

Dispela tu i lukim Lahanis i abrusim Rangers na Warriors, husat i go pas long ol mangi Apo.

Win bilong Vipers na Mioks las wiken i soim tupela i surik i go antap long leda tasol kisim sem posisen olsem tupela i bin holim pastaim.

Maski Bombers i soim sampela kain strong, dispela i no inap long kisim gutpela spes na ol i stap autsait yet long top 5.

Rangers, Warriors na Kuris i stap aninit long leda tasol namba tu hap bilong resis dispela yia i no pinis yet.

Ol i gat narapela 8-pela pilai stap yet we i ken helpim ol sapos ol i win.

Ol tim husat i stap autsait long banis bilong fainols i ken go insait long fainol 5 sapos ol i min bisnis na wokhat nau.

Muruks mas pilai strong long Goroka long dispela wiken sapos ol i tingting strong long stap insait long fainols.

Lus bilong ol long Lae i mekim ol i bel sut na planti sapota i no wanbel.

Tasol Lahanis tu stap insait long dispela bikpela pilai olsem na bai lukim olsem Muruks i no inap tok 'lipi lipi' long Goroka.

Tu, ol Goroka sapota i no lukim Lahanis i pilaim wampela strongpela gem na bai pulumapim tru Se Danny Leahy pilai graun.

Vipers mas kisim was taim ol i

go long Kokopo.

Gurias i save rausim olgeta tim husat i save soim pes long Kokopo na bikpela tingting bilong ol long nau em long stopim ol mangi Mendi long noken putim lek bilong ol na i go moa yet.

Bihain long kam bek bilong intanesinol pilaia, Jessie Joe Parker, ol i bin mekim save tru long wanples tim, Rangers na i luk olsem ol bai winim ol arapela tim tu.

Tasol, long sait bilong Rabaul em narapela kain - nogat wampela tim i save win long Kokopo.

Rangers mas soim sampela kala bilong ol long dispela wiken taim ol mangi Simbu igo daun long lukim ol.

Rangers i no mekim gut insait long namba wan raun tasol ol i gat ol gutpela pilaia husat i save

pilai long ol bikpela gem na ol birua i mas kisim was.

Warriors i kisim gutpela malo-lo long wiken na ol bai kam wantaim strongpela tingting long win.

Ol i mekim gut long ol pilai bilong namba wan raun na i mas mekim gut long namba tu raun.

Bombers i bin mekim bikpela lus bilong ol long raun wan taim ol i go pilai long Wabag na dispela belhat i stap yet.

Olsem na ol bai mekim olsem Mioks bai namba tu tim, bihain long Muruks long lus long Lae, asples bilong ol.

Bombers i no kisim gutpela sapot long ol bisnis komyuniti long Lae tasol dispela i no stopim ol mangi long win na dispela win bilong ol wantaim Muruks i givim ol sampela tingting pinis.



SEK HAN: Helpim bilong Digicel bai strongim pilai na wok bilong Sparrows. FOTO: Digicel.

Sparrows kamap

SPARROWS netbol klap insait long Nesenel Kapitol Distrik (NCD) i save helpim long kamapim planti ol yangpela pilaia.

Dispela luksave wantaim gutpela pilai bilong ol i winim helpim bilong Digicel olsem wanpela sponsa bilong ol.

Long las wik, Digicel i givim K6, 000 long tim long helpim ron bilong ol dispela yia.

Tim i amamas na i tok dispela helpim em i no bilong netbol tasol, em i bilong komyuniti tu bilong wanem ol meri insait long komyuniti save pilai dispela spot tu.

Bosman bilong sels bilong Digicel, Michael Townsley, i tok ol i amamas long sapotim pilai bilong ol meri olsem ol i save mekim long pilai bilong ol man.

"Mipela i laik yusim komyuniti spots long sapotim na strongim ol meri tu," em i tok.

Long soim amamas bilong ol long nupela sponsa bilong ol, tim i senisim nem bilong ol i go long "Digicel Sparrows". Julianne Leka Maliaki husat i makim Sparrows i tok dispela mani bai helpim tim long kamapim na ronim ol program bilong ol.

"Mipela i ron gut tu insait long Mosbi netbol resis na Digicel i ken amamas tu long dispela," em i tok.

Sparrows i gat tim long 5-pela divisen, anda 10, 13, 15, 17 na 21 we ol wok developmen i save kamap long skulim ol gut long pilai.

"Dispela helpim bai mekim mipela inap long pulim planti moa yabngplea meri kam pilai netbol we i bihainim tu astingting bilong klap," misis Maliaki tok.



KALA: Ol Rebels wantaim nupela yunifom bilong ol.

Kala bilong Rebels

KIMBE Rebels i gat nem long ragbi sevens (7's) na dispela wiken bai ol i soim kala bilong ol gen long namba 4 Kimbe Invitation Sevens resis.

Tasol dispela yia ol i gat helpim tu bilong Axellerate Sports husat i givim ol nupela yunifom bilong dispela tonamen.

Axellerate Sports em kampani long PNG we i save kisim ol gutpela spots yunifom bilong "KooGa" i kam long ol tim na klap husat i putim oda long ol.

Mani mak bilong dispela helpim ol i givim long Rebels em Aus\$2, 000.

"Long makim maus bilong West

New Britain Rugby Football Union (WNB RFU) na Kimbe Rebels skwat, mipela i laik tok amamas long Anthony Toscano long sponsasip bilong ol long dispela ol jesi bilong tim," WNB RFU presiden na pilaia, Freddie Mathies i tok.

Rebels i tokaut long skwat bilong ol pinis bilong tonamen dispela wiken.

Nogat planti senis i kamap long tim tasol bipo pilaia bilong ol, Gina Ponda i go pilai ragbi lig wantaim Agmark Gurias long bemobile Cup.

Mathies i tok Ponda i go tasol em i opim dua bilong ol arapela yangpela pilaia olsem Timothy

Pola, Junior Tikot na Hendry Liliket.

Em i tok ol i gat planti gutpela pilaia husat inap long pilai kain kain posisen.

"Mipela i luk fowet long dispela tonamen na sampela ol tim we bai givim gutpela salens em Dingos bilong Brisbane, Aroma Coast, Uni-Tech Reds na Madang," Matthies i tok.

Rebels tim em; Freddie Matthies, Michael Vitolo, Hubert Vitolo, Gare Ponda, Tony Ponda, Daniel Ponda, Nelson Daplin, Hendry Wartovo, Jack Mesili

Timothy Pola, Hendry Liliket, Junior Tikot.

Manmeri helpim basketbol long Aitape

BASKETBOL pilai graun long Aitape i bagarap olgeta tasol nau ol manmeri wantaim helpim bilong BSP benk long hap i bung wantaim long kirapim bek dispela post.

Las wik ol i go daun long pilai graun na helpim long wasim, klinim na penim bek ol ples bilong pilai.

Ring bilong tromoi bal i go insait tu i bruk na bagarap tasol ol i stre-tim.

I no long taim nau bai ol manmeri ken pilai basketbol gen.



Amet laik strongim bek Mosbi ragbi

SPOT RAUN

WANTAIM

Scott Vavine, ML



2010 Sentral provins netbol tonamen

ANINIT was bilong Eksekutiv Dairekta bilong PNG Sports Foundation, Misis Iammo Launa, Sentral provins netbol tonamen i kamap wanpela bikpela pilai we i save kamap olgeta yia.

Ol arapela tonamen long ol arapela provins i no save wankain olsem.

Dispela pilai save kisim ol tim i kam long ol asosiesen bilong wanwan ples insait long wanwan distrik we i lukim moa long 1,000 i save kamap.

Ol liklik i go bikpela, yangpela na lapun tui save pilaia insait long wanwan divisen bilong ol.

Dispela ol divisen em; anda 10, 13, 15, 17, 21, A, B, C na Golden Oldies.

Olsem na sapos yu laik toktok long sait bilong divelopim ol yangpela pilaia, Sentral provins netbol tonamen i save mekim dispel.

Planti gutpela samting i save kamap long ol yangpela husat i pilai gut na i go antap long ol sinia level we ol i ken i gat sans long go long Intanesenel level tu.

Tupela wik i go pinis, dispela ol gutpela pilaia bilong olgeta divisen insait long Sentral provins i bung long Rita Flynn kot long Mosbi long soim save na strong bilong ol.

Tonamen i nogat sponsa tasol i save kisim helpim bilong provinsol gavman na wanwan manmeri husat inap long givim han.

Planti samting em Asosiesen yet i save go pas long lukautim.

Mi save olsem tim lida bilong dispela resis, Iammo Launa bai lusim dispela wok na i go daun bilong wanem em i gat planti arapela bikpela wok wantaim PNGSF.

Na tu em bilong wanem nogut ol arapela spots insait long kantri bai ting olsem em i wansait na i sapotim wanpela spot tasol.

Dispela em wanpela samting we Sentral netbol asosiesen i mas lukluk long en hariap na makim narapela man o meri long kisim ples bilong Launa.

Sampela ol arapela eria we ol i lukluk long en tu long taim bilong dispela tonamen em long teknikal divelopmen, junia divelopmen program na ol arapela samting olsem pilai graun we ol i mas gat.

Dispela em samting ol samting ol i lukluk long en longpela taim nau olsem na ol eksekutiv bilong asosiesen i mas mekim sampela samting long stretim.

Astingting bilong mi em olsem, em i gutpela long kamapim kain bikpela tonamen tasol em bai no inap kamapim planmti gutpela divelopmen long ol yangpela sapos i nogat kain ol samting i stap.

Ol junia i mas i gat gutpela kosing klinik na ol trening kem taim oil i stap aninit yet long ol junia divelopmen program.

Wok bilong kamapim na ronim ol tonamen em i wanpela rot bilong luksave na stretim ol yangpela long ol bikpela gem tasol em i no save helpim save na pilai bilong wanwan pilaia yet.

Ol kosing na junia trening kem bai nap long helpoim ol long dispel, em i bikpela samting.

Dispela tu em i wanpela samting ol eksekutiv bilong dispela tonamen i ken lukluk long en bilong gutpela bilong netbol insait long provins.

Tingim long amamas gud long olgeta gem yu pilai.

ARNOLD Amet Junia (Jr.) i winim ileksen gen olsem presiden bilong Port Moresby Rugby Football Union (POMRFU) na i gat bikpela tingting long kirapim bek strong bilong gem long siti.

Amet i tok bihain long ol i makim em long Julai tri olsem, em i laik stretim gut na apim gen levul bilong ragbi insait long Mosbi.

“Bikpela astingting bilong dispela ol nupela eksekutiv nau em long kirapim na strongim bek pilai bilong dispela gem,” em i tok.

Em i tok tu olsem wanwan klap insait long POMRFU i mas stretim ol yet na pilai bilong ol bai ken go antap we inap givim Intanesenel luksave long gem bilong Mosbi.

“Ragbi long Mosbi bai no inap go antap sapos yumi ol kosa, pilaia na refri no givim han long strongim gem na mekim gem i kisim gutpela luksave,” Amet i tok.

Em i tok PNG save pilai ragbi yunion tasol dispela i no min olsem yumi mas amamas long kain pilai bilong yumi.

“Yumi bai no inap kamapim gutpela



BIKPELA TINGTING: Amet i laik strongim bek POMRFU. FOTO: POMRFU.

pilai long Intanesenel level sapos yumi nogat gutpela resis long provinsol level bilong yumi yet,” em i tok.

Amet i tok sapos dispela kain ol wok i no kamap bai ragbi long Mosbi stap wankain tasol.

Namba tu bilong Amet em Dokta Moale-Nou Kariko, Kerry Walsh i

kamap tresera na Lahui Ako em sekreteri.

Amet i tokaut tu long 20 memba bilong POMRFU husat ol bai go pas long mekim ol dispela wok i kamap.

Dispela ol lain em ol bipo ragbi pilaia bilong PNG olsem bipo Pukpuks kepten, Ian Liveras, John Susuve, Frank Makanuey, Abel Tore, Andy Agovaua, Gabriel Tika, Geoffrey Puipui, Kevin Rooney, Sydney Wesley, Anthony Pangkatana, John Larry, Sailosi Druma, Jamie Dolla, Douglas Guise, Keith Puaria, George Hoki, Ella Ora, Joe Kautu na Cecil Davani.

“Dispela grup bai wok bihain ol astingting na divelopmen program bilong PNGRFU,” em i tok.

PNGRFU presiden Richard Sapia i amamas na i givim tok orait long dispela wok bilong POMRFU.

“Mi givim olgeta sapot bilong mi long dispela program.

“Ol ragbi pilaia, kosa na refri bilong yumi mask am aninit long dispela kain ol program bai em i ken mekim ol i wok gut moa,” Sapias i tok.

Yia bilong Rivian



2010 EM i kamap olsem gutpela yia stret bilong nambawan junia Papua Niugini sprinta (sprinter) o man bilong ron spit, John Rivian.

Em i go ron pinis long India, Brisbane, na nau em i go long IAAF Wol junia sempionsip bilong etletiks long Canada we em i ron insait long 400m resis.

Rivan wanpela tasol bai makim PNG long dispela tonamen bihain long em i kamapim gutpela pilai long nesanel sempionsip long Lae las wik.

“Dispela em bikpela yia bilong John,” Sekreteri bilong PNGAU, Philip Rehder i tok.

“Em i go pinis long India wantaim nambawan skwat bilong PNG na bai go tu long Yut Olimpik gems long Singapore long mun i kam.

“Bihain long dispela bai em i go tu long komonwelt (commonwealth) gems long Oktoba long India gen,” Rehder i tok.

Long komonwelt gems bai em i stap long rile (relay) tim bilong ol man tasol.

Rivan bai traim long apim pilai bilong em long winim mak em i putim long wol yut sempionsip long Itali long 2009 we i no gutpela tumas.

Dispela i lukim ol i rausim em long 200m resis bihain long em i no statim gut resis.

“Dispela ekspirians wantaim ol arapela em i kisim long Brisbane na India dispela yia bai givim em gutpela strong na save taim em i ron agensim ol arapela junia sprinta bilong wol,” Rehder i tok.

Rivan i go daun long Sydney, Australia we em i bung wantaim ol arapela etlit bilong Pasifik na Presiden bilong Osenia etletiks, Geoff Gardner na ol i go wantaim.

Moa long 180 kantri stap insait long dispela sempionsip long Canada.

RON: Rivian bai kisim gutpela fom bilong em i go long planti bikpela resis dispela yia. FOTO: PNGAU.

LAE BISCUIT CO.



WANTOK

SPOTS

LAE BISCUIT CO.



Isu 1875

Wan wik: Fonde, Julai 22 - 28, 2010.

talk all day
all night for **1t** per min
after the first minute



Call your bemobile wantoks for as long as you like with our *wantoea wantok* rate. Only **1 toea** per minute after the first minute, anytime!

bemobile *toktok moa*

Raun tu i stat nau

Ol tim sanap klostu

Bustin Anzu i raitim

NAMBA tu raun bilong bemobile Cup resis i stat las wik Sande na ol tim husat i stap daunblo long leda bai pilai wantaim bel na tingting long stopim ol narapela husat bai stap insait long fainols long go daun.

Planti tingting nau i kamap long ol tim husat i go pas long resis long wanem, ples we ol i stap insait long

leda tu i no gutpela tumas long ol. Ol i stap klostu klostu na wanpela o tupela lus bilong ol inap kamapim planti senis long sanap bilong ol. Long raun wan, tripela taim primia, Structural Building Systems (SBS) Muruks i bin go pas wantaim 17 poin na 2009 primia Agmark Gurias i bin ron baksait long ol wantaim 15. Stop 'N' Shop Vipers na Toyota Mioks wantaim i ron namba tri ples long 1 poin tasol

Vipers i gat gutpela pesen long go pas liklik long Mioks. Narapela tupela tim, Masta Mak Congo Coffee Kundiawa Warriors i kisim 9 poin tasol Rangers i ron long pesentes. Bintangor Lahanis i bin kisim 8 poin, Lae Bombers 6 na Wantok System Mount Hagen Kuris i bosim tebol long aninit wantaim 4-pela poin.

Moa long Pes 25



POTO: NICKY BERNARD.

WANPLES: Vipers i stap long namba tri ples na Rangers i stap namba 6.

Jeep
Patriot



Nogat Deposit Leasing i Stap nau long K90 wanwan dei

I stap long ol lain mipela i tok arait long kisim, sampela tems na kondisen bai i stap!

BOROKO MOTORS

HEAD OFFICE PORT MORESBY PO Box 1259, Boroko Cnr Waigani Drive & Cameron Road, Gordons. phone: **325 5111** Fax: **325 5301**
EMAIL & WEBSITE info@borokomotors.com.pg | www.boroko-motors.com

